



Tir Yimyim

www.tiryimyim.in


Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 9

'Triple Talaq' sobaliba menokdangra sorkari tiyongi ia inyaksü: Naidu



TAPAK 8

India nungeri Rambo character meraksatsütsü imlar: Stallone

VOL. XIV NO. 212 (ADOK 212)

DIMAPUR

SUNDAY

MAY 21, 2017

5.00

Prof. Pardeshi Lal-i NU nung VC inyaker

Dimapur, May 20 (TYO): May 18, 2017 nü Nagaland University nung Zoology Professor, Prof. Pardeshi Lal-i Nagaland University (Central University) nung Vice Chancellor inyaksü mapa agizükogo.

Nagaland University indang otsü nung, university nung teinyakdak Professor ka Vice Chancellor shimbaji tang mezüng lir.

Prof. Lal ya 1997 küm Zoology nung Professor inyaksü shim. Pai Vice Chancellor mapa meinyakdang, Head of Department (HoD),

Professor Incharge (PIC) in Lumami during Transit Headquarters in Kohima, Dean of School of Sciences, Controller of Examinations aser Pro Vice Chancellor mapatem inyakogo.

University Grants Commission (UGC) telatetba nung, küm 10 tashi professor inyakba nisung ka Vice Chancellor shimtsü akok ta shia lir. Vice Chancellor indang kümsükji küm pungu mesüra arishi küm 70 tashi lir.

University ka nung Vice Chancellor ka tanaben iba kasa mapa atema shimtsü makok.

India-China tesendaktep ajanga tensa süngjemogo: Rajnath

Gangtok, May 20 (Agencies): Honibarnü India-China arrtsü nung terenlok mapa indang review senden dak sendakba nung Union Home Minister, Rajnath Singh-i, kidanger linük ana tesendaktep junga lir, koba ajanga linük ana tsüngda mepetmesü ajema kümogo, ta metetdaksü.

"India-China arrtsü onük nung linük ana tangatetba balala lir," ta paisa ashi.

"Tanü senden amendang India-China arrtsü nung terenlok mapatem asadangogo. Home Ministry-i lenmang 27 yangludat aser item mapaji 2019-20 küm tashi nungbo tembanga inyaksü. Iba dak alia ano gari lenmang 48 yanglutsü atema maparen tenzükogo," ta paisa ashi.

Home Minister-i ashiba agi, arrtsülen aliba nüburtemji asalentong atema kanga tongtibang, anungji item tesem nung parnoki nüngdakba terenlok mapatem inyaksüla.

"Külen asen security sepaitemi arrtsü kümzüka ayur aser külen arrtsülen aliba nüburtemi asenok asalentong atema tongtibang," ta Rajnath-isa ashi.

Tanü Gangtok nung linük ana arrtsü dak sendakba nung arrtsü konghsia aliba state pongu nungi chief minister tem den senden amenba sülen pai, "Arrtsülen aliba nüburtem nem anema-alibaren, shisaliok, electricity, tzi aser lenmang ama terenlok mapa inyaksütsüla. Ni state sorkartem dang iba atemaji inyaksü metetdaksüogo," ta ashi.

(Maneni tapak 11 nung...)

KYO-i sorkar & Construction Company dang metetdaksür

Dimapur, May 20 (TYO): Dimapur aser Kohima tsüngda NH.29 nung four lane atema ali tutuksü tenzükba sülen Kiruphema yimsüng kübok Peducha nung anentsüh alua lir. Iba timtem ya tziunglu aruba aser four laning construction company (Gayatri)-i ali mashi endokba ajanga ajuru, ta Kiruphema Youth Organisation (KYO)-i metetdaksü.

Iba khuret ajanga garitem senzütsü asoshi timtem ajurur aser gari tilatem Peducha nungi Kiruphema (Basa/Bawe), Shalom Bible seminary nungi Secü Zubza len senzütsüsa kümogo. Anungji, sorkari "by-pass" road temesü ya ulushia yanglutsü mepishir aser iba dak sendakba mapaji KYO-i ketdangsüa reprangtsü, ta parnokia ashi.

(Maneni tapak 11 nung...)

Naga Students' Federation mungdang amungtsü mazüngi renemteper



NSF Central Organizing Committee züngsemtem den AKM planing committee aser local organizing committee pur külemi mungdang ki jakdang tangokba noksa nung angur. (Mokokchung, 20 May, 2017)

ULB aser Art 371(A) indang temetetsütem lemsatetp

Justice H.K Sema-i State Law Commission tentetsü shidang



May 20, 2017 nü CCC Kohima nung workshop alidang Chief Minister Dr. Shurhozelie Liezietsu den ketdangsertem aser Ex-PAN züngsemtem külemi agiba noksa ka angur.

Kohima, May 20 (TYO): Linük Temzüng nung lateta aliba junga memetetba aser yimsüsürtem o nübortem tsüngda amalitep maliba ajanga Linük Temzüng nung Arrla 371(A) tim mesüi amshir aser mashileni meyipsar, ta Supreme Court Judge (Retd), Justice H.K Sema-i ashi.

Honibarnü Capital Convention Centre, Kohima nung Ex-Parliamentarians Association of Nagaland (Ex-PAN)-i ayongzükba Workshop on Urban Local Bodies (ULB) vis-à-vis Article 371 (A) nung o jembidang Justice H.K Sema-i, "mashileni meyipsaba aser amalitep maliba ajanga state nung

terata tulu adokdaksüogo, anungji lennirtem aser ketdangsertemi teküpoktiba jenjang nung nübortem dang iba ya angatetdaksütsüla" ta ashi.

Naga loktiliba nung 'ism' ya tsükchir tulutiba lir aser kin o kin tsüngda 'ism' maitdaksütsüla. Tetsür nem shilem lemsüktsüba ozüngji State Legislative Assembly-i yangluba lir aser iba nung linük temzüngren nungi teuyuba mali, ta paisa shisem.

Teburtemi amokbanger aliba loktiliba ka nung tebur aser tetsür kasa jenjang nung melitetsü. Ozüng balaka yanglu nungdang tetsür o tebur jenjang kasa akümtsü aser iba atemaji tetsür

nem shilem lemsüktsüba ya sabang ka lir. Iba tebilemstü atema Nagaland nung State Law Commission ka tentet nung junger, ta Justice H.K Sema-isa metetdaksü.

"Urban Local Bodies ya ozüng ajanga tentetba lir aser ULB temji state sorkar indang shilem ka ama inyaksüla. Arrla 371(A) nung state asoshi temeten balaka agüja lir, ajisüka iba Arrla yagi State sorkar nem agüja aliba tashi amshiba nung tetsükdaksü bener marutsütsüla," ta High Court nung Retired Judge, Justice Zelre Angami-i ashi.

(Maneni tapak 11 nung...)

Politics nungbo teti medemera mali aser tsükchira mali: Nüklutoshi

Mokokchung, May 20 (TYO): Politics nungbo teti medemera mali aser teti tsükchira mali, khenkhen alutsü aser khenkhen atutsü aser ibaji yimya dang, ta Adviser to Chief Minister aser Mokokchung Incharge Nüklutoshii metetdaksü. Pai iba o ya Honibarnü Naga People's Front (NPF) Mokokchung Division telen balala nungi party lenirtem den divisional office nung telungjem mensem ka amenba mapang ashi.

12 buba Legislative Assembly nung yipru mopung tulu arua kümsük (tenure) tepiyong tensa majung dang ajangshia aruogo

aser iba amai timtem tali buluba ya otsüsütsü ka asütsü, ta pai ashi. Iba ama mepetmesü aliba ajanga nüburtema janratema metenzüktem, saka mapang tensa agi ya dang bener aru nung ajaki angatetsü imlar, ta paisa sasaba olen ka ashi. "Kümsük ka nung Chief Minister asemben tashi melenba ya koda, anungji, iba ya tia maka tenure ka asütsü", ta paisa shisem.

Paisa ashiba agi, ita trok tsüngda bye election-ji agitsü/ magitsü ta asübaji tang tashi election commission nungia tetuyuba tejangja ka arua mali, aji

saka, Dr. Shürhozelie-i bye election nungji metoktepra pai elected member kar nem CM mendenji agütsütsüsa akümtsü. Aji ta kodang südir iba tenure nung CM pezüben melener asütsü, ta paisa ashi.

"Taremsükker temoatsüba" ta ashiba ama, timtem khuret jenti ajuruaka item ajakji aremsükka party nükjidong shitak yur ochishia inyaksü asoshi paisa party tenzükertem ajungshia liasü. "Asenoki aremsükki, kenü anü tasen adoktsü yongya atadi", ta paisa teimla o ka shiogo.

(Maneni tapak 11 nung...)

Mokokchung, May 20: Naga Students' Federation (NSF) pur 27 buba lokti senden sentong "Amelioration" omen dak rangloker May ita 30 nung June 2, 2017 tashi Ao Kaketshir Mungdang (AKM)-i host süa Tzürangkong Range nung amungtsü asoshi luden balala shima mazüngi inyaktepdaki.

Iba sentong nung NSF kübok telen balala nungi tejaokertem, kin balala nungi yar tsüngsang nung shilem agitsüpur telok balala, kidanger state balala nungi kaketshir teloktem, Myanmar nungi

densema aser sentong nung shilem agirtem aser official dena nisung ajak agi meyi ana shi arua adentsü imladaki.

Taküm iba sentong nung tongti tejaokertemji; Union Minister of State for home Affairs (GOI) Kiren Rijiju, Nagaland Chief Minister Dr. Shürhozelie Liezietsü, PWD (R&B) Minister Y. Vikheho Swu, CAWD & Taxes Parliamentary Secretary Dr. Benjongliba Aier, Lok Sabha MP Neiphu Rio, Legal Metrology & Consumer Affairs Parliamentary Secretary (Govt

of Arunachal Pradesh) Laisam Samai aser Nagaland Chief Secretary Pankaj Kumar IAS nungertem asütsü.

Iba mungdang dak sentakba nung May 20 nü NSF central organizing committee (COC) convener Kelhouneizo Yhome den NSF tir Subenthung Kithan nati anir par külem medemertemi AKM planning committee aser local organizing committee pur den Tzürangkong nung mensem ka kaogo. Iba mensem nungji tongtibangsa tang aruya aliba NSF mungdang mapalem tapu balala jembia liasü.

Minister Vikheho-i Pughoboto nung GPS ana semzüksü



May 20, 2017 nü Roads & Bridges Minister, Y Vikheho Swu-i Zunheboto district kübok Pughoboto Sub-division nung GPS ana semzüksüba sentong nung tangokba noksa nung angur.

Kohima, May 20 (TYO): Honibarnü Roads & Bridges Minister, Y Vikheho Swu-i Zunheboto district kübok Pughoboto Sub-division nung Government Primary School (GPS) tasen ana semzüksüo.

Minister-i GPS Natsumi aser GPS Heboluqa semzüksüba sentong nung pa kinüngtsü, Ahikali Swu, ADC Pughoboto Avelu Ruho aser SDEO Vikuto nung den tanga ketdangsertem dena liasü.

Iba sentong nung jembidang Minister-i, GPS ana lapokba ajanga tanur nem shisaliok tajung agüja tajemdakdak junga yangertsü tamang akar, ta metetdaksü.

Pughoboto sub-division nung kaketshirtem ajungshitsü mechi nung pai 'Beyond Books' sentong tenzüksütsü, kong ketdangsertem, kentenerem, entrepreneurs aser artist temi school tem semdanga

kaketshirtem den shisa lemsateptsü, koba ajanga tanurtem shisaliok nung dang masü saka tarutsü atema sempettem arangshitsü.

Minister-isa Sumi Aphuyemi Teachers Welfare Organisation-i iba tesem nung Government School Football Tournament ayongzüka akaba atema pelaba lemsatop.

Paisa tesayurtem dang pei mapa nung kanga nendaka inyaksü ajungshi.

Kaketshirtem dang sobaliba aser yimya tajungtem benshitsü ayongzüka minister-i, tanurtemi pei oshi aser sobaliba a k h ü m t s ü b u t s ü s a intetdaksütsüji tsüraburtem khuret lir, ta ashi.

Minister-i ashiba agi, SSA programme tenzükba sülen state nung aliba sorkar school tem nung temelenshi aika adokogo.

Pai sensotem, tesayurtem aser kaketshirtem danga school

infrastructure anepalua amshitsü ayongzü.

Swu-isa ashiba agi, Year of Economic Development of Pughoboto dak sendakba nung 2013 küm nungi project aika tenzükba inyakdar, aser iba nungji Piggery Project, Cycle Network, Tree Plantation, Skilling Pughoboto aser Thuwuni densema lir.

Paisa, Pughoboto ya tiyongtsü tesem ka nung lir, anungji nüburi item mapatong maongka agia rongsenkettsüng ajungkettsü ajungshi.

Minister den kinüngtsü aser ADC nungeri anir school meketa süngdong tema liasü.

GPS Natsumi nung kaketshir 32 den tesayur pezü lir aser GPS Heboluqa nung kaketshir 33 den tesayur trok lir.

School ana ya SSA senotsü agi yanglu aser school nung menden den 'desk' Swu-i tenla agüja liasü.

Naga yimtenren telok balala nungi nisung 56 GPRN nung aden

Dimapur, May 20 (TYO): Naga yimtenren telok balala nungi nisung 56-i Naga nung tarutsü teimla aliba telok, NSCN/GPRN nung adentsü lemtetogo, ta GPRN Ministry of Information & Publicity-i tanü sangdong ka nung metetdaksü.

2015 August 3 nü agiba tezüngzüktep, Framework Agreement sülen temelenshi balala nung ajemdaker parnoki tasuita aser shisa kaa telemteba tajung agibaji Steering Committee Executives, Cabinet Kilonsers, Deputy Kilonsers aser Heads of Departments densema aliba NSCN/GPRN Joint Council-i pelaa agizüker, ta sangdong nung shia lir.

Tang GPRN nung adener tasenpurtemi NSCN/GPRN lenisüba nung tamang katetba lemsatopba den külemi tatembang telemteba tajung ka dangi arutsü atema longjemer inyaksü ta shiogo, ta sangdong nungsa shia lir.

GPRN/NSCN (Unification) nungi arur züngsemtemi NSCN/GPRN tatong Tir, Gen. (ret.) Kholi Konyak, Ato Kilonser Th.

Muivah, Kilo Kilonser Rh. Raising, Tatar tem, Heads of Departments aser tongti lenirtem dang, NSCN/GPRN lenirtemji chichiba lenirtem lir, shirnoki ken o telemteba tajung ka bener arutsütsü ta tamang akar, ta ashi.

Züngsemtemisa Unification telok nung inyakbaji tejang matangtsü ta rajemogo, kechiyong terenlokba mali aser lenirtem dak mangdang aser yimtenren onük mali, ta parnokisa shiogo, ta kasa sangdong ajanga ashi.

Tasenpurtemisa NSCN/GPRN lenirtemi parnok NSCN/GPRN nung agizükba atema pelaba lemsatop.

NSCN/GPRN lenirtem tenüng nung tasenpur agizükdang NSCN/GPRN Kilo Kilonser, Rh. Raising-i parnok dang pelaba lemsatopba den külemi Naga nung atema pei tajungtiba agi tenzüksü ayongzü.

Paisa, linük dang nungi kecha meimlai pei akokba tajungtiba agi linük tenzüksü ajungshia liasü.



Küpza Kaketshir Telungjemi ayongzüka 2017 HSLC aser HSSLC nung toppers aser mezüngbuba jenjang nguteterem nem tetushi agütsüba sentong ka Kúpza community hall nung meraketa agiogo. Iba sentong nung yimden yimsüsur, Arogapur aser kaketshir lenirtem arua aden. Takok angurtemji; Kr. Nokinsangla T. Imchen, HSLC top 14th aser mezüngbuba jenjang angur par pezü nem tetushi agüja senpettsü. Mokokchung, 20 May, 2017.

Japan-i NE state 3 nung project balala yaritsü melunger

Guwahati, May 20 (Agencies): Japan linüki Assam, Nagaland aser Manipur state tem nung tang teinyakdak terenlok project tem aser tarutsü nung inyaksü aliba project tem nung yaritsü melunga asüngdangogo.

Sorkar otongdar kati ashiba agi, Bodhbarnü New Delhi nung Minister of State (Independent charge) of Development of North Eastern Region (DoNER) Jitendra Singh aser Japan ambassador, Kenji Hiramatsu na senden amendang Japan-i NE nung sen indoka inyaknüba lemsatopa liasü.

Otongdarisa ashiba agi, "Pai (Hiramatsu), NE tesem nung teinyaktetsü mapa jenti lir aser India sorkari iba tesem nung rangloker inyakba apir Japan-ia jenjang balala nung senotsü aser tanga lenmangtem nung külem ser inyakner ta shiogo."

"Paisa, shishilembaba aser entrepreneurship dak alia Japan sorkara iba tesem den tesendaktep lir, kechiyong Second World War mapang nung Manipur aser Nagaland nung British sepai aser teloktep sepaitem anema raradang Japan nunger sepai 30,000 asü ta shiogo," ta otongdari ashi.

Japan-i NE tesem nung inyakba project balala nung yariteptsü melungba pelaa agizüka DoNER minister-i, "NE tesem nung gari lenmang aser apotem yanglutsü maparen nung Japan-i senotsü indoktsü melungba atemaji DoNER ministry-i asadangtsü. Ano tawa tenzükba mapatong-Brahmaputra nungi Bay of Bengal tashi inland waterways transport nung Japan densema inyaksü akok, iba den külemi NE nung DONER ministry-i sangdongba Venture Fund nunga yaritsü akok ta shiogo," ta otongdarisa metetdaksü.



May 20, 2017 anogo nung Nokpu yimtak asür, Rev. Ajanto Aonok tenüng nung Loktii süngdong atemba sentong ka senior citizen temi ayonga agia liasü. Iba sentong nung Wb. Lima Imchen ACF Mokokchung, pai süngdong ajanga koma meimchir nem tajangzük agütsür iba indang lemsatopa liasü. Dr. L. Sunep Aonok-i (asür. Rev. Ajanto'er jabaso) sarasadema iba süngdong atemba sentong tenzükba liasü.

32 AR-i prangpong shibelener ka apu

Dimapur, May 19 (TYO): Prangpong shibelener aliba osang tejangka ka lazükba sülen May 19, 2017 nü 32 Assam Rifles den police züngsemtemi Dimapur, Burma Camp kiyong mita oa liasü, aser iba mapang nung Assam Rifles sepaitemi nisung ka ket nungi pt 32 mm Pistol ka den magazine aser pt 32 mm injang ana apu, ta AR

sangdong ka nung metetdaksü. Tang pua alisangji Dimapur District, Lhokheto Colony nung alir arishi küm 65, Xviihosha Zhimo lir ta jangjaogo; maneni bushisüngdangtsü atema pa den pa ket nungi apuba prangpong aser injangji East Police Station, Dimapur ket nung agütsüo, ta kasa sangdong nungsa shia lir.

35 ToTS refresher training kaogo

Dimapur, May 20 (TYO): Nüburtem tsüngda tamang kadaksütsü aser alima lendong ataloktsüsa aliba tesemtem aser rehabilitation tesemtem jangjatsü atema 35 TOTs asoshi Community First Responder (CFR) indang refresher course training ka May 20, 2017 nü Circuit House, Zunheboto nung kaogo.

Iba sentong ya NSDMA, DDMA, HG&CD aser SDRF Zunheboto-i ayongzüka liasü.

Ano local tesemtem indang rajema alitsü atema Familiarization Exercise (FAMEX)-a agia liasü. Ward tenet nungi CFRs 70 aser ward pongu den sub-divisional town tenet nungi CFRs 350 nem TOTs-i training agütsütsü.

Rongdak kümzükba maparen aser first aid atema training agütsüba dak alia sub-divisional CFRs TOT ajak nem basic training kits lemja liasü.



Agartala, May 20, 2017: Honibarnü Agartala nung Tripura Finance Minister, Bhanu Lal Saha-i osangbenertem den GST indang jembiba noksa nung angur.

Meghalaya nung tanaben sorkar kümtettsü asoshi Cong-i merangdangdar

Shillong, May 20 (Agencies): Taruba küm election tanaben koka sorkar menden kümtettsü asoshi Meghalaya nung Congress pur kanga meranga inyakdar. Assam aser Manipur nung BJP sorkar kümtetba aser Meghalaya nunga party pur tsüingdang nung mangatettep adokba sülen state party lenirtemi New Delhi nung party bangdak lenirtem dang parnok yaritsü asoshi mepishiogo. Northeast nung Mizoram aser Meghalaya nung dang Congress-i sorkar menden kümteta lir.

PWD minister S Dhar-i yimjak nung par party cabinet aser West Jaintia Hills District kübok Jowai assembly constituency nungi MLA aser CM Mukul Sangma indang deputy, RC Laloo anema pa tekü pusemtsü, ta metetdaksüba sülen party telung nung mangatettep adok. Jowai District Congress Committee ajanga Dhar anema shidi ka agütsüba sülen, MPCC tir aser taoba mapang chief minister DD Lapang-i party anema shirnoki inyakdir parnok merenshitsu ta olen ka metetdaksü. "Congress pur

tsüingda nung mangatettep adokogo aser nüpurtemi temelenshi ka atema taruba küm vote asütsü," ta National People's Party (NPP) nung lenir kati ashi. National People's Party (NPP) ya Centre nung NDA sorkar nung shilem ka lir. Sangma shiba dang Belgium nung oa ali, pai taruba küm state election dak sendakba nung pa tebilemba kecha melemsateper. Mukul-i taruba küma par teloki election koka sorkar kümtettsüba kanga temolunga lema dang lir.

Telungpurtem bendanga agütsüba policy ya tamakok ka lir: Manipur CM



N Biren Singh (File)

Home Minister Rajnath Singh den lemtepogo.

"Telungpurtem temai adoka parnok sasa bendanga agütsüba dak sendakba nung parnok achaayangtsü asoshi maparen telatet ka maliba atema kanga tezüdanga bilemer. Iba ajanga parnok bendanga agütsüba policy ya amajok kümdaktsüogo," ta pai ashi.

Temzüng nung yimya agi, telungpurtemi parnok prangbong bendanga agütsübatem Army nem agütsütsü nungdaker aser parnoka pei tata camp nung alitsü nungdaker.

Biren Singh-i ashiba agi, telungpurtem bendanga agütsüba dak sendakba nung inyakyim nung tamakok alua lir, kechiyong taoba mapang bendanga agütsüba telungpurtem junga maziukteter.

"Telungpurtem bendanga agütsüba policy tejangja ka mali. Taoba mapang nung bendanga agütsür aliba telungpurtem nem parnok talidak ki asütsüba amala nung teyari shidak magütsür. Parnok aser parnok kibongtem liyonga aotsü asoshi sen aatsüba lenmang kecha mali," ta paisa ashi.

Army-i telungpur telok kar denbo parnok bendanga agütsüba dak sendakba nung kulizüngtepa yuogo, saka Manipur sorkari-i ibaji magizükteter aser iba ajanga police aser paramilitary force temi tribal telungpurtem areshia khaseter mesüra parnok apur.

Telungpurtem temai adoktsü asoshi ajungshia adokdaksüba sülen iba amala tensa ajanga parnok sasa dang teyari kecha makai liyonga aotsüsa akümer, ta ketdangser kati ashi.

Nükjidong takang ayuba ajanga takok angutsü: Assam Angh

Guwahati, May 20 (Agencies): Honibarnü Assam Angh, Banwarilal Purohit-i, temolung lema bilemba, nükjidong takang ayuba aser mapang tamshi shia amshiba agi taküm nung takok angutsü, ta metetdaksü.

Tanü Guwahati nung aliba Raj Bhavan nung Saraswati Vidya Mandir, Umrangsu, Dima Hasao nungi kaketshir 45 den jembidang Angh-i, "Ajakji takoktsü lir, anungji kaketshirtemi pei taküm nung nükjidong yur temolung lema aser mapang amshia shia ibaji arishitsüla," ta ashi.

Paisa kaketshirtem dang, ochishia alitsüla aser kanga nendaka inyaktsüla, kechiyong takok angutsü atema lenmang tezüba mali, saka meranga inyakba ajanga dang takok angutsü, ta ashi.

Pai kaketshirtem dang sobaliba

meteta alitsü atema ayongzük.

Purohit-i kaketshirtem meina arur tesayurtem danga, kaketshirtem atema tembar ka asütsüla, shisalen sayur ka asütsüla aser kaketshirtem len anitsüla, kechiyong tesayur mapa ya akhümket mapa ka lir, ta ashiba den külemi kaketshirtem dang lenla ajak nung tesayuba agütsütsü ayongzük.

Paisa Mahatma Gandhi aser taoba mapang ato kilonser, Lal Bahadur Shastri otsütem nung ajemdaker kaketshirtem dang nendaka inyaktsü aser taziökba nuga alitsü ayongzük.

Kaketshirtemi tongmelang taküm alitsüla, nendaka inyaktsüla aser meranga inyaktsüla, kechiyong itemji ajanga dang tangari tatishitsu tajung agitüssa Mahatma Gandhi aser Lal Bahadur Shastri nung nungtugu akum, ta Angh-isa shisem.



Guwahati, May 20, 2017: Honibarnü Guwahati yimti kübok Beltola kiyong nung mi lendong tulu ka adokba tesem nung Fire Brigade sepaitemi bushisügangba noksa nung angur.

Party dang nungi temaba shinga mali: Lapang

Shillong, May 20 (Agencies): 2018 küm Meghalaya nung assembly election agitsü lia party anema inyakba mapatem nokdangtsü nükjidong nung state sorkar tashi nung aliba party Congress-i, nisung shinga party dang temaba mali, ta ashi.

Meghalaya Pradesh Congress Committee (MPCC) Tir, DD Lapang-i ashiba agi, power minister Sniawbhalang Dhar-i deputy chief minister RC Laloo anema candidate ka shimmer ta shia ibaji anema Jowai Block Congress Committee-i temepishiba shidi ka agütsüogo.

Congress Bhavan nung osangbenertem den jebidang Lapang-i, "Atangji, Jaintia Hills BCC-i kü dangi temepishiba shidi ka yokogo," ta metetdaksü.

Pai ashiba agi, pai West Jaintia Hills District Congress Committee dang osang tejangja meshiogo, aser iba nungji ajemdaker ang tim teinyaktsü inaktsü.

Meghalaya Congress party sasep nung mepetmesü adoka lir aser ministertem den MLA temi yimjak nung külem party

lenirtem aitsüteper.

West Jaintia Hills Congress Committee Tir, Lakhmen Rymbui-i, "Snawbhalang Dhar-i party anema inyakba atema Jowai BCC-i pa anema onük agütsüogo. Osang angazükba agi, pa deputy chief minister, RC Laloo anema candidate ka shimmer. Iba ya party temzüng ozüng alema inyakba lir," ta ashi.

Jaintia Hills region ya Congress junga amenoka aliba tesem ka lir.

Ano block aser district-level committee temia party tongti lenirtem dang assembly election matongdang party lenirtem tsüingda aitsütepa mesüra party aenma iyakba mapatem nokdangtsü mepishiogo.

Sangküm küm tetenzüklen state assembly election agitsü lia Congress MLA aikati tanga party den adentsü südi ta bilemer.

Lapang-i, "Osangkakettem nung olulu prokba nung ni tamang makar, aser itemji ochi ama magizüktsüla," ta ashi.

Paisa, party ticket alemdang tang temendak MLA tem nem tama maangka agütsütsü, ta metetdaksü.



Sikkim, May 20: Union Home Minister, Rajnath Singh-i Sikkim, Nathu La tesem anasa Sherathang ITBP Border Out Post semdangba mapang ITBP pur den tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, MAY 21, 2017

TSÜNGREM TSÜBUBA LENIR

Nagaland nung tang ya Tsüngrem tsübuba lenir bushiba mapang lir. Aji oda, Nagaland asoshibo National mesüra Regional party ta kecha mali Tsüngrem tsübuba lenir aser Yisu dak züngzünga amangba telok ka nüngdaker. Atangji, Nagaland nung alir Naga nungerbo ajak amai Khristan kümer asütsü, anungji lenir ajak Khristan kibong nungi adokba lenirtem lir. Ajisüaka, aikati Tsüngrem metsübur. Tanü Nagaland raksaba aser majungba tebilemstüji idak nung jagi tenzüker. Tsüngrem metsüburtemi nisungbo kenyongi mali amai dang bilemstü, iba jagi ochimashi mapa asüyonga shinga mali ama sademsadema inyaker. Iba tebilemstü ya koktettsü asoshi Khristan kibong shiai Tsüngrem tsübuba lenir adokdaksütsü asoshi inyaksü kanga rongdak nüngdaka kümogo. Apijemtsü Shin 9:10 nung ashir, " Tsüngrem tsübubaji shisatsü tetenzükdak aser Temeshisang metetbaji tangatetba angudak lir." Tetezü shisatsü angutsü asoshi Tsüngrem tsübutsüla aser tangatetba angutsü atema Yisu Khrista metettsüla. Tanü asenoki shisatsü bushii sen aika endoka kaketreju balalai yoker, ajisüaka shisatsü yabo kaketreju nung masü Tsüngrem tsübuba nungi angur. Atangji, kaketreju nung temetetba angutsü saka Tsüngrem metsübura tashitemetet kümer nübortem timtemdaksür ka dang akümstü. Kaketreju nungi angazükba temetetba kecha meliaka Tsüngrem akümstübu aliba ajanga shisataka aküm aser Egypt lima Yosef yimsüsür aküm aser Babilon lima nung Daniel lenir aküm. Item ajakji Tsüngremi agütsüba shisatsü ajanga nübortem madak lenir akümba liasü. Aji oda, Babilon lima nung Nehemia-a Tsüngrem tsübuba yimsüsür ka aküm. Iba mapang kenü anogo par kinunger kar Yirusalem nungi aru aser pai parnok dang Yirusalem tia indang asüngdangdang, Yirusalem jara ajak laogo aser yimti süngküm kishi ajak rongdoktsüogo ta parnoki pa dang ashi. Idangjisa, temulung shirang marem Nehemia ajep. Tsüngrem tsübuba lenir ka dak alitsüba sempetji aji lir. Tsüngrem tsübuba leniri nübortem kanga meimtsü aser parnok asoshi teti aria bilema alitsü. Iba shisatsü jagidang oagi talang nung aliba pei lima aser yimtsüryimer aser kinungertem indanga shisabolua bilemstü. Iba shisabolu jagi pei lima aser pei nübortem indang metenüa asüngdangtsü. Tsüngrem metsübur lenirtemibo pei yimtsür yimer aser adianu kinunger ajuruyonga koma Ir (?) ta masüngdangtsü, kechiyong shiranga lir ta mesüra majunga mesüra timtem nung lir ta ashi nüngbo semdangtsüsa mesüra yaritsüsa akümstü aser sentsü atsütsü, anungji koma lir (?) ta asüngdangtsüa arendaka bilemer. Nehemiabo par lima Yirusalem nungi aluba kinungertemi alua atong matatet, tongli Yirusalem tia indang asüngdang aser iba osang angashir mapang tatsüka tsüngda pa tonga tur pai anir Yirusalem jara yanglushitsü tenzüker. Idangji parnok meküta alir tsükchirtemi Yihuda nungertemji amokmerena tsübudaksü. Ajisüaka, Nehemiai ashi, tetsübu Kibubai asenok asoshi raratsütsü, nenok pei kibong kümzüktsü asoshi rarang ta ayimoktsü. Iba amaji tanü asen lima nunga yimten raksar aliba yanglushitsü asoshi tamasa asenok ajaki pei kibong raksatsütsüsa ajuruba aser angashiba temenentem anema tasü itta nokdaktettsüla. Lenir tajung aser tamajung ajak kibong nungi dang adoktsü alinung, Nagaland yanglushitsü aser meraketa alitsü atema Naga nunger Khristan kibong shia nungi Tsüngrem tsübuba lenir adodaktsütsü asoshi tang nungi terenemshiba balaka nung apusotsüla. Yirusalem raksaa yur bendanglen chuba kidanga Nehemia tipdema melitet ama, asenok Naga lima yamai topur majungtsüsa raksateta yur Naga nunger shinga pei kidang aser bendanglen tesem balala nung anisüngzüka mekazütsüla. Pei lima raksaa yur pei kija ajangzüktsü bilemba nisungjibo pei kin ashioksür asütsü. Atangji, ibai Nagaland raksaa aliba yanglutsü asoshi Tsüngrem tsübuba nisung bushiba mapang lir. Asenoka Nehemia ama asen lima asoshi jepa sarasademdi aser pei pei kibong nungi Tsüngrem tsübuba lenir adokdaksütsü renemtsüdi.

OLEMSABANG

YI TONGPANG WALUNIR

- N. Imo Longkumer, CTN

1962 küm tejaklen nungi tenzüka Nagaland nung yi nokdangtsü atema lokti balalai takangba agüja aru, saka temelenshi kecha makai Political Rum agi Nagaland mopanga adok aser yi lar agi asüng. Anungji 1988 küm Pfutsero nung NBCC mungdang akadang joko yi anema Hunger Strike aser Non-cooperation Movement akatsü lemtet aser aji tenzüksü atema tamasa District HQ ajak nung Protest Rally akatsü renem aser 1989 March tashi nung yi dokan ajak shibangtsü memorandum ka church leader 500-i sign sür Governor nem agütsü, kechiaser ibai President Rule mapang liasü. Yi agi alima menenba, lokti aser kibong raksaba, lanurtem mashileni aoba, ozüng raksaba yamala teraksa aika Governori ngua kanga süoki ia bilema nüburi aginüba ama ataloktsütsü nangzük. Nagaland Chief Minister khristan saka pei nüburi indang aria mebilemba ngua Naga nunger masüba Governor katiang lenji arua nüburi akhangba ataloktsütsü nangzük.

1988 küm Konyak Women Body ajanga Mon nung yi anema rally tuluka ayongzük, aser iba kümsa Mon District Dry ta sangdong. Kasa kümji Mokochung nung volunteers 365-i tasü tonga lumitsü bendanga agütsü aser Janury 3, 1989 nungi hunger strike tenzük. Iba tetsübuttsü mapaji ngua Mokochung DC P.M. Gaur, IAS kanga aoksa tsübu nung tananü Mokochung District 'Dry' ta sangdong.

Joko Nagaland rangpen dry state akümstü atema June 20, 1989 nü delegate 1000 Kohima Ao church nung sentep aser Hunger strike metenzükdang church leaders teshimtet Assembly kidangi oa ajurutep, saka Govt. telemtetba nung License lirabang yi yanglutsü, amshitsü aser ayoktsü akok ta renema liasü. Iba mezüngmeshi mapa ngua church leader tem NBCC office-i meyipa or ayimtena jepa Tsüngrem dang ain meshizük aser tasü tonga lumitsü nisung 1000-i bendanga agütsü. Saka Medical checkup sür nisung 1000 nung jagi nisung 125 dang health agi melaa lir ta shimtet. Anungji item tasü tait walunirtem jagi Naga lima yi mojing nungi kümzükang ta bendanga agütsü. Idakji kübo apur tambur tema dena liasü, parnoki tzüa mejemi lumi aser parnok rongnung aika temang touzük kg.10 tashi ajema aküm aser nisungpu memeteti tasütsü jenjang tashi lur laoadok. Parnok tenüngtemji: 1. Rev. Yetoshi 2. Rev. Zanao Evan 3. Rev. Jepdak Pastor 4. Rev. Yamyap Executive Secretary 5. Heneze Pastor 6. Imkümchiba Deacon 7. Arshilu Pastor 8. Mar Pastor 9. Kekhevi Pastor 10. Kapikhru Pastor.

Iba tesüngmangtsü mapa ajanga Naga lima ajak anakshi. Iba tatalokba ngua Chief minister-i NBCC-i aginüba ama meladi Hunger Strike-ji anenang ta mepishia mesüzükdang, saka aiben nüburi mesüshia aruba ngua strikeji tesashiba aküm aser nisung tali-tali senden. Walunirtem aika iba lima nung mali kümogo, anungji parnok mapaji Naga lima nung Khristan tamanger ali tashi item walunir mapa kodanga mamadoktsü. Kechiaser ibai Nagaland nung tatalokba (event) tuluka lir. Arogotem nung mapang shia iba mapa asoshi tenüngsang agüja kasa ainji meshia sarasadem sentong akatsüla. Yi mojing den raraan license ajak anendakja takok angu saka ibaji süsüa amadokba ajanga tangar anisemer aruba asenoki mokok akümer.

Nisungi koktetla sayatenya masü asünung chief minister-i anir Govt.-i Nagaland state 'Dry' ta sangdong. Saka taoksatsü kaji iba sülena Govt. ozüng nungji yi permit meliaka yanglutsü aser ayoktsü akok ta enoka liasü. Anungji NBCC-i Govt. dang ozüngji nüburi aginüba ama shitak meyanglura ano hunger strike tesashiba tenzüksü ta metetdaksü. Anungji ozüngji yanglushir March 29, 1990 nung ang Nagaland State Liquor Total Prohibition Actji pass süa mapa aküm.

Tanü asen lima nung yi nokdanga license ajak agiena liaka shiruru tepok nung techanu bona alidang tepsettsü atema jangrong agi tenaka masü ama miimshia shibelena ayoker jenti aliba ajanga parnokbo takar akümer aser yi mojing chubar. Yi ajemer jenti anojungi pei arishi lepdoka samar. Tangbo nüburi Yimyim melenshia Tsüngrem dang akhangtsü nüngdaker. Yi ji shingala mamshira iba dak kecha temenen mali anungji tang nungbi shirnoki yi shibelena alima menentsür, item pur anema yi den külemi atakatemtsüla. Yi nokdangbaji Tsüngremi mulungba süra Pai item amshir temjia samatsütsü südi. Anüng nung tongnusen ana-na atoka anguba ama mapa ajak nung positive aser negative teti lir. Asenoki küm 10 tsüngda yi samadaksütsü atakzüka yuaka asen menen yari ibaji 10 ben 10 küma aotsüa shibai metet.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

KHRISTAN KIBONG

- T. Tsükjem Jamir, Senso Missionary, Longsa Baptist Arogo, Camp Dimapur

Okila :-

ABAM-i kum shia arogotem ajak Khristan kibong hapta ayongzuka amonger aser ano aji dang masu local arogo shia kum shia revival sentong aser seminar palala ayongzuka agir. Saka ya ta kibongtem nung temelenshi kangabo mangur. Tanu putu nung tongtipangsa town nung alirtem kijung lanu kibong aika sorkar mapa inyakertem aser business balala inyakertem mapang agi aiben mesutepba ajanga programme sentong tajung balala ayongzükaka sentepi maruteter. Anungji arogotemi akok ka asu nungbo onüktemji kaket nung tongtipangtem zülur kibong shia nem agütsütet nungbo kanga ajungtsü.

Tetenzük nung Tsüngremi ashi, nisungji pa kija alitsü majung anungji pa asoshi teyarir tajung ka yangludi ta sür tetemsü tetsür ka yanglu. Aji oda Adam and Evala na ajanga alima nung meimchirtem soyapanga ao. Mezüng kibong Adam aser Eva nati Tsüngremer ozung raksa, anungji Tsungrem kanga jashi, tena chir kain aser Abel liasu, tena chir tambosang kaini teno Abel tepset, iba jagi ano Tsungrem kanga tali jashidaksü. Item kibongtem aser nisungtemi Tsungrem tashi mangaba ajak nungi kumzuktsü mechi Tsüngrem Yisu Khrista alima dangi yok. Tanu Yisui pa taküm agütsüba ajanga asenek pa taochi nung alir.

Kodasür Khristan kibong tajung tenzüktsü. Yisu alima nung alidang kana nung kiyir benjong alidang Yisu aser par nütsung kiyir benjong jagi jaok. Iba keyir benjong chiyongba mapang parnok yi agima. Anungji iba keyir benjong nung ketdangertem kanga shisabulua ali dang Yisui tzu agi yi kumdaksür külen kiyir benjong nung arurtem ajak tiptema jemdaksü. Iba kiyir benjong nung parnok Yisu kiyir benjong nungji jaokba ajanga parnok nungdak ajak peridaksü, aji oda Khristan kibong ka tetenzükji temeshi kiyimba nung Tsüngrem mulung chia tenzüktsüla. Yisui ashi, süngdong tajung nung süngjang tajung atanger, yamaji apuani tajung süra chirnur tajung akümer. Abraham tamang agi par chir ka dang aliba Isak Tsüngremi meshiba ama tenla agütsütsü mulungtet. Anungji Tsüngremi Abraham dang pa kü tembar ta aja. Abrahamer kibongji kinungtsü Sara aser par chir Isakji tebu den liromedema tamang kasa liasu. Iba jagi Tsüngremi pa nungi jakzükba kintem moatsü.

18th Centaury nung kibong ka otzü yamai liasu, sosana welsely amitsur ka liasu la kinungbui tanur 7 (Seven) toktsur yakta sua adok. Anungji lar kibong timtim tulu ngua kiyongertemi la tang ashi nai nur chir paikati mumesutetsü, parnok nisung tamajung akumtsü anungji jaboso karbo tanger num mesutsü agujang ta ashi, Idangji lai pei kiyongertem tang ashi. "ni Tsungrem dak tamang ayutsü aser ni ku teka anaprongla junga ali tashi kü chirtum mesutsü tsubua mali". Yamaji pai Tsungrem dak tamang tulu yur par chir ajak tangar madak nokdaker ka ka kumdaksü item jaboso rongnung England lima nung sayutsungir tulutiba John wdsely akum, Pa ajanga England aser America nung Revival tulu adokdaksu.

Israel nunger Egypt lima nungi Mosai anir apusodang Yihusua asangur ka dang liasü, saka pai Tsüngrem dak züngzunga amanga par lenir Mosa den timtem ajak nung yaritepa liasü, Tia maka Kanan lima atongtsü mapang Mosa süaadok anungji Tsüngremi Israel nunger tenangzükba Kanan limai anir aitsü atema Yihusua shimtet. Iba mapang Yihusua ashi ni aser ozü kibongibo onoki kibubasa tenzüktsü aji oda pa tamang ajanga Israel nunger lakeh terok 6 aposaba nungi putir Caleb aser par kibongi dang Kanan lima tongtet. Yihusua kibong ama kibong lanu asüadang yongi Tsüngrem mulung chia alitsü nungdaka lir.

(Manenitaruba adok nung...)

ANO GO ABEN TSÜNGREM DEN

NENOK DAK METSÜ LIDAKJANG

".....saka Metsü dak tanangji samadokra, nenoki aji kechi agi nangdaksütsü? Nenok dak Metsü lidakjang aser nenok o nenok na putepa liang".

- Mark 9:49-50

Metsü ya shisatsü aser tangatetba nung amshiba asenoki Lai nungji angur. Nisung shia dang nenok koda langzüksü tim aji nenoki metettsü asoshi nenok O teti taochi den, metsü agi nangdakja liang ta shia lir. Yamaji Yisu Khrista-i Mt.5: 13-16 nung alima nung Yisu den anidakertem atema Metsü aser milen tesangwa agi atishia Yisui parnok mapa aser taküm indang atishia jembiba idaki angur. Iba tatishitsü anaji nütsungtem mapa tajung atema atishia ashiba lir.

Nütsüng kati Yisui sayuba nungji manidaki, Tebu sentsüwangshi metsü dak tanang samar tagidak makai akümba aser amang nung tesangwa nembanga ayuba den kasa lir. Ano laishir kari yamai ashir, Yisui par nütsüng dang shisatsü aser tangatetba indang sayubaji alima sangrasangji jagi menendaksüra, mesüra Pa tesayubaji alima den meyoktepra, metsü dak koba shisatsü aser jenjang lir, ibaji samadoktsü aser Pai sayuba shisa O ji amajok akümtsü.

SARASADEM:

*Kibuba Yisu, Metsü dak tanang aliba ama,
Na meimba nung iba tanangji tesamatsü.
Amen.*

Khristan lennirtemi Trump dang Jerusalem-i US Embassy belentsü mepir



Washington, May 20 kuma inyaka sayutsü mepishir" (Agencies): Mongulbarnü ta shidi nungsa shia lir. Khristan lennirtemi US Iba shidi nung Khristan President Donald Trump dang lennir 60-i sign asu aser parnok Israel yimtiba agizüktsü aser rongnung- National Religious U.S. ozüng akhümstüba Tel Broadcasters president & Aviv nung aliba US. Embassy CEO Dr. Jerry Johnson, Family Jerusalem-i belenang ta Research Council president mepishia züluba shidi ka Tony Perkins, Family Talk and agütsü. Focus on the Family founder & president Dr. James Dobson, In

Iba shidiji American Christian Leaders for Israel (ACLI)-i ketdangsüa zülü aser Touch Ministries president Dr. Charles Stanley, Christians International Christian United for Israel founder & Embassy Jerusalem indang chairman Dr. John Hagee, U.S. kongsangia yaritep. Precept Ministries founder

Jerusalem Embassy Act of Kay Arthur; International 1995 ajanga "Jerusalem ji Christian Embassy Jerusalem Israel nung President, Susan Michael, USA director Parliament, aser Supreme aser The Christian Broadcasting Court den ano sorkar ministry Network CEO Gordon aser reju aika indang menden Robertson nungertem dena lir.

lir" ta lateta lir, ta parnok Yaküm US Tir election züluba shidi nung shia lir. Trump-i Jerusalem-i U.S. Iba ozüng ya October 1995 Embassy belentsüba indang nung yangluba liasü aser U.S-i tenangzükba agia liasü. Israel dak alia tanungba linük

linük ajak nung yimtiba nungdang US president Trump indang embassy tem lapoka lir. adviser karibo pai nangzükba Anungji, Israel nunga US-i ama tekaratiba nung Jerusalem- embassy belentsüla, ta i embassy belentsü ajungmesor Khristantemi züluba shidi saka State Department, nungsa metetdaksü. Department of Defense aser

"Nai balaka nangzükba ama intelligence agency temi Trump tekaratiba nung mapa inyaksü dang embassy belen nungbo aser ano United States-i kum 20 yimjung maparen inyakba nung jakdang teyariteper linüktem tetsükdaksü ajurutsü akok ta dang nangzükba ama mapa ashir.

Gospel kentener Chris Blue-i 'The Voice' final tongogo



The Voice Season 12 finalist- Aliyah Moulden, Chris Blue, Lauren Duski, Jesse Larson

Los Angeles, May 20 (Agencies): Knoxville nungi tekülem lennir Chris Blue-i The Voice indang final tongogo. Pai "Take Me to the King" tekülem ken atenba sülen final-i aitsü maongka angu.

"Tsüngrem dang kanga pelar, @aliciakeys @NBCTheVoice aser Nenok ajak dang kanga pelar" ta Blue-i final atongba sülen Twitter nung metetdaksü.

Blue ya Team Alicia nung züngsem lir aser pai gospel kentener Tamela Mann-i atenba "Take Me to the King" ken ajanga nisungtem jangratemdaksü aser pua.

"Pa atema hopta shia sentong ayongzükba arogo nem Chris Blue-i tetushi agüja ken aten. Pai iba ken atentsü atema pa indang Gospel tera ayangdak tashi ai aser tetsükdaksütem ajak ajanteta, tamang indang ken aten" ta kaketzülur Denton Davidson-i ashi.

Taruba hopta The Voice Season 12 final nung Blue den Lauren Duski, Aliyah Moulden aser Jesse Larson nungertem tokteptsü,

Blue den Duski aser Moulden nungertemji parnok indang vote aser iTunes nung

ayokba asadangba sülen final-i ai aser Larson jibo Instant Save ajanga final atong.

Duski aser Moulden na Blake Shelton'er telok nung lir aser Blake-i season 11 nungi 5 nung takok nguogo. Larson ji Adam Levine'er telok nung lir aser Adam-ia season 11 nungi asem nung takok nguteta lir.

Blue ji Alicia Keys'er telok nung aser yaküm lai tamakok angu. taoba Hombarnü The Voice sentong agiba sülen, shibai final nung takok angutsü ta asadangba ka nung, Blue -i 41%, Duski-i 28%, Moulden-i 20% aser Larson-i 11% angu.

OLONG PAITEP # 4427

		1				2	3			
	4			5						
6						7				8
						9				
			10							
11									12	
			13							
						14				
15										

TIPLÉN

- 2. Arishi kúm tom asúdang - (5)
- 4. Inyaksü tuyu - (5)
- 7. T _ _ _ ng - (3)
- 9. Ghonda metsür pezü - (5)
- 10. Tzü ayimdak - (5)
- 11. Mapang matongdang - (5)
- 13. T _ _ _ m - (3)
- 14. Senyur - (5)
- 15. Metetjem - (5)

LANGTSÜNGLEN

- 1. Mang aremdak - (5)
- 3. Kecha mait, maka - (6)
- 5. Ajurunü / Ngunü - (6)
- 6. Tenüing kasa - (7)
- 8. Ayong tila - (7)
- 9. Tzünglu nokdangba - (6)
- 10. Tarutsü indang shiteterem - (6)
- 12. Tzü kongadok - (5)

OLONG PAITEP # 4426 TELANGZÜBA

TIPLÉN :

- 1. Tatem, 4. Ozü, 5. Amajok, 7. Anem,
- 8. Chi, 10. Tai, 11. Tezü, 13. Semzük,
- 14. Ber, 15. Aener.

LANGTSÜNGLEN :

- 1. Tajung, 2. Taküm, 3. Mori, 5. Asentzü,
- 6. Shimtet, 9. Tzümar, 12. Mera,



Alokba mapa nungi arudang tebutsü Warakla kidang mali, mobile ajanga bushir :

Alokba : Tantsü, na kong lir? Ni yaseta mapa nungi shilang nung kidang shinga mali, yaseterako niilii....

Warakla : Ayaaa ma tambu, ni tang ya na, nü promotion atema nenok Saabpaer kidang lirko, küna metener Meemsaaba aini oadokerji na atema detail nung tera ajak soa jembir ang arujar nai dang reprangshiranga chiyunga dang ataangma noo.

Alokba : Süra tantsü, kodang tashi nungbo promotionji mapa akümtsü amai!

Warakla : Tambu na kecha terata, asüngnepbo order adoktsütsü ta ashira, ajiang masü Saabpai ashibaji niang pa den amalitep tajung katetra nabo küm nung anabena promotionji agütsütsü ta asüra.

Alokba : Tantsü sürapangla pai kong ammag ta shidir kanga junga zep zep ta ammer kazüangma.

Warakla : Oh Alokba!

Lilir : SMS

TANÜBO NAI LANGZÜANG

Q. Küm shia amungba African Development Bank (AfDB) Group senden koba city nung akatsü ?

- [A] Valencia [B] Gandhinagar
- [C] Lisbon [D] Shanghai

(Taruba adok nung onoki langzüsü)

YASHIADOK TELANGZÜBA : Aravind Kumar Rengan


Tepela Tasoba Anogo

Tanur asoba anogo nung salem osang den noksa angali adokdaksünürs - Tenüing, Küm, School, Talidak & salem osang tejanga zülür, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimim: bureau tem nung agüjang.

1. Tenüing :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAIA YA METETER MA

Indian Premier League (IPL) asayamung nung runs junga nguteter nem 'Orange Cap' naroküm den kasa korangji agüja asemer. Yamaji 2017 IPL asayamung nunga parnok 10-i iba alizung tongtetogo aser parnok tenüing tsünglanglen agütsür:



Pos.	Player	Mat.	Inns	Runs	HS	Avg	SR	100	50	4s	6s
1	David Warner	14	14	641	126 v KKR	58.27	141.81	1	4	63	26
2	Gautam Gambhir	16	16	498	76 v GL	41.50	128.02		4	62	7
3	Shikhar Dhawan	14	14	479	77 v KKR	36.04	127.39		3	53	9
4	Suresh Raina	14	14	442	84 v KKR	40.18	143.97		3	42	13
5	Steven Smith	14	14	421	84 v MI	38.27	124.92		2	36	10
6	Hashem Akhla	10	10	420	104 v MI	60.00	145.83	2	2	40	17
7	Manish Pandey	14	13	396	81 v MI	49.50	128.57		2	28	12
8	Parthiv Patel	16	16	391	70 v GL	26.06	136.23		2	46	8
9	Rohit Sharma	13	13	388	93 v KKR	29.84	149.00		2	43	17
10	Rbin Uthappa	14	13	388	87 v RR	29.84	165.10		5	36	21

SUDOKU # 3539

				4		9											
		7					8		7	5	3	4	8	6	2	9	1
		3					6		9	6	4	7	2	1	8	3	5
	1		8	2		7			3	1	7	8	6	2	5	4	9
5						3	2		4	8	2	5	9	7	1	6	3
4	2		7	6			1		5	9	6	1	4	3	7	8	2
7	2	4		3		8	1	5	6	4	9	2	1	8	3	5	7
9	6			1		4	3		2	3	5	6	7	4	9	1	8
				5	2	6			1	7	8	9	3	5	4	2	6

TELANGZÜBA # 3538

				4		9			8	2	1	3	5	9	6	7	4
		7					8		7	5	3	4	8	6	2	9	1
		3					6		9	6	4	7	2	1	8	3	5
	1		8	2		7			3	1	7	8	6	2	5	4	9
5						3	2		4	8	2	5	9	7	1	6	3
4	2		7	6			1		5	9	6	1	4	3	7	8	2
7	2	4		3		8	1	5	6	4	9	2	1	8	3	5	7
9	6			1		4	3		2	3	5	6	7	4	9	1	8
				5	2	6			1	7	8	9	3	5	4	2	6

OJANG LUTEP # 4031

- OGARO : □□□□□
- NGNU : □□□□
- KBTENZÜAJI : □□□□□□□□□□
- TEMTSATÜ : □□□□□□□□
- STSÜDAKÜR : □□□□□□□□□□
- IPE : □□□
- UNAJG : □□□□□
- BAPINYAKUR : □□□□□□□□□□
- NTIJE : □□□□□
- KTSADOÜ : □□□□□□□□

OJANG LUTEP TELANGZÜBA # 4031

NAGALAND NUNG GENERAL ELECTION MAPANG ATONGERJI PARTY TAPU BALALA ADOKER

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnok ashibaji shidak asü tai-ar nai-a na asoba anogo ita den tanü nü tia medemdangang (Horoscope) :



Aries
21/3-19/4

Tanü anogo nai tarutsü asoshi sentong yangluang. Tang na lenmang shitak nung jajadagi. Sentong yanglutsü asoshi mapang tajungtibaji nikongdang 4 nungi 6 ako tsüngda mapangji asütsü.




Taurus
20/4-20/5

Tanü anogo nai nü molungjang taroktiba nungi na shisadangtsü. Tanü anogo nai sentong yangluba ajanga tarutsü nung na ajangzüktsü. Telemtetba agitsü asoshi mapang tajungtibaji 5 nungi 6 ako tsüngda asütsü.



Gemini
21/5-20/6

Tanü anogo na pela alitsü. Kibong nung züngsem kari takok anguba ajanga kibong nung tesünep alitsü.



Cancer
21/6-7

Nai mapa meranga inyaka aliba ajanga senotsü nung nai tajangzük angutsü. Mapa ajak liromedema inyaksü merangang. Nikongdang 3 nungi 6 ako mapangji na asoshi tajungtiba asütsü.



Leo
23/7-22/8

Tanü anogo nai nü shisatsü azüoktsü merangang, aji oda mesüra na jashitsüsa mapangi bener arutsütsü. Nikongdang 4:30 nungi 5:30 ako mapangji na asoshi tajungtiba asütsü.



Virgo
23/8-22/9

Tanü nai lenmang aika nungi tajangzük angutsü. Rongsen aser tetushiji nü meyong asütsü. Nikongdang 4 nungi 6 ako mapangji na asoshi tajungtiba asütsü.



Libra
23/9-22/10

Tanü anogo na tezüdang tera alitsü, anungji nai jangraba mapa kar inyaksü merangang. Nikongdang 5:35 nungi 6:45 mapangji na asoshi tajungtiba asütsü.



Scorpio
23/10-21/11

Tanü anogo na alien senzütsü mesüra medemer kar den amongtsü. Nai tanü anogo ajak den yimjung alitsü merangang. Nikongdang 3:45 nungi 5:45 ako mapangji na asoshi tajungtiba asütsü.



Sagittarius
22/11-21/12

Tanü anogo na tepela nung alitsü, aser nai ibaji tangar dena lemsatepnütsü. Tanü anogo nai teyari nüngdakbapur kar yaritsü. Nikongdang 6:15 nungi 7:30 ako mapangji na asoshi tajungtiba asütsü.



Capricorn
22/12-19/1

Tanü anogo nü dak shisatsü tasen kar alitsü, aser ibaji ajanga nü taküm tejakleni anitsü. Süoshi temesüng asema ajanga nü tia ajungtsü. Nikongdang 3:20 nungi 4:40 ako mapangji na asoshi tajungtiba asütsü.



Aquarius
20/1-18/2

Tanü anogo ner kidang ainer kar anenzüktsüa akok. Kinüngertem den külemi anisüngzuka amongtsü merangang. Nikongdang 5 nungi 6 ko maoangji na asoshi tajungtiba asütsü.



Pisces
19/2-20/3

Tanü anogo nü dak sempet aketba ajanga nai tangar aikti puadoktsü. Nai inyakba ajak nung takok angutsü. Nikongdang 4 nungi 5 ako mapangji na asoshi tajungtiba asütsü.

TEMANG ANEMALIBAREN

Exercise agiba ajanga teret tashi taitba kümdaktsür

Temang anema alibaren tsütsü mongin nisungtemi bushitetba osang tasen ka ajanga ashiba agi, exercise teti agiba ajanga tenüngla nung temo aliba rongtokba nung teyari agütsür aser iba ajanga hopta ka tsüngda nung teret tashitaitba kümdaktsür

Bushisüngdang ajanga sa ashiba agi, temang telur shirnok teret yimya agi temang tilar dang nungi tashi maitba alir, parnok asoshi tali tajangzük asütsü.

"Bushisüngdang ajanga ngutetba rongnung tongtibangtiba kaji exercise ya teret asoshi tajung dang masü saka teyari tulu agütsür," ta US, Chapel Hill, University of North Carolina nung Assistant Professor aser Lead author Maya Styner-i ashi.

Styner-isa ashiba agi, "Iba bushisüngdang koya dak tendangba nung ngutetba agi, asema ajanga mapang tatsüka tsüngda nung koya teret tashi taitba akümba bushitet,"

Koya aser nisüngna temang yimya balala süaka koya teret nung temo adokdaktsüba stem cell aser nisung teret nung temo adokdaktsüba yimya kasa dang lir.

Temang tulur aser teret dak sendakba nung bendenloksema Styner-i ashiba agi, iba bushisüngdang ajanga teret tashimeiti aoba kulitem; diabetes, arthritis, anorexia, aser steroid medications tem amshiba amala dak sendakba nung mejangjateti alibatem inyakyimtem jangjaa kümdaktsüba nung teyari agütsütsü.

Bushisüngdang ajangasa tuyuba agi, teret nung tanga timtem alibatema exercise ajanga temelenshi bener arudaktsütetstü akok.

"Teret indang 'biomechanics' onoki bushisüngdangba nung ngutetba agi, exercise agiba ajanga teret tashi aser teret jenjang tajungba akümba ngutet, talisa temang tulurtem exercise agiba nung tajangzük tali ailba ngutet," ta Styner-isa ashi.

(Source - Internet)



Q. Nagaland nung General Election ya taküm 2017 kümsa agi nunga koma süla ?

Nagaland nung General Election ji kodang agidir agiang, saka asen Nagalima nung yimsüsür aser yimtsüng shia lenirtemi ochishia Khristan lima ka mesüka nangzükba ama agiteter asü magiteter ta dang bilemdangdi.

-SMS

Aya-a oda General election ji tagibosa agitssüsaji odang taküm-a agiyonga ajungtsü ta dang nibo bilemer ati, saka dang clean election agitsü ta asüba ama shiba yaridir yariang asen nübur atema yarirji iba isapji shiangaia sen yong pei vote ji yoka machijitsütsüla. Aseni kodang sen meshia chidir tarutsü nung asen telangzü maka alitsü, anungji tang nungibo asen Naga nunger ajak atema inyakdi ta ayongzükter.

-SMS

Nagalnd nung General election ji 2017 aser 2018 kecha tetsüngda mali. Election agiba shia Clean election agitsü atema ajaklen jembir saka teti kasa dang, kecha terenlokba, yanglushiba mangur. Teraksarjibo kodanga mesamatsü, saka teyanglurbu malitsü. Lokdi tentet onsara saka kong telongjem, temeim ali?. Anungji, electionji 2017 mesüra 2018 agiyonga Nagaland tiaji kasadang alitsü. Auer kabu teti alitsü aser tajunger kajia teti kasa dang asütsü.

-S.Among Lkr Nagarjn Dmp.

General electionji odang taküm agi nunga kecha masü, kechiba süra sangkümbosa agitsübasajito. Saka clean election agitsü taser takümbo kanga meranga inyaka angur kanga dang pelar, anungji iba amaji inyaksü merangtsüla ta dang. Asen Naga nunger rongnunga asen Aorsa tamajungba ago dang iba yimyaji indokti ta asen Aor ajak ayongzükter atiji.

-SMS

General Election ji kodang agidir agiaka, aser kechi koma tayongzükba liaka, tanü Alokbai langzüba ya dang asütsü.

-SMS

Nagaland nung general election ya taküm agi ka süra ajia junger saka asenoki tang nungi clean election inyaka aoba ama, pei voteji yoka machitsü merangdi aser pei yim pei ajung ta dang mesüli ta süra, asen Ao limaji sentsüprang ama akümstü merangdi arung ta dang nibo bilemer.

-SMS

TAN HOPTA ATEMA - KOMA SÜLA ?

Q. Nagaland nung senzüba taxi aser auto rickshaw ajak ya Naga nungertemi dang anitsüla ta ozüng küma latet nunga koma süla?

Olong 20 shi nung June 2, 2017 tashi nung iba telangzüba ya onok dangi e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.




May 20, 2017: Pippa Middleton aser James Matthews na Britain nung Englefield, St Mark's Church nung May 20 nū kibong akūmba sülen Duchess of Cambridge Catherine den külemi tangokba noksa nung angur.

India nungeri Rambo character meraksatsütsü imlar: Stallone

Los Angeles, May 20 (Agencies): Actor tejen Sylvester Stallone-i India nungeri Rambo character meraksatsütsü imlaba lemsatep. Nüngtugu Hollywood action movie Rambo ya Hindi nung yanglushitsüba lir.

Stallone shibai iba film nung tongti shilem agi, pai Hokolbar aonung Instagram ajanga iba osang lemsatepa den külemi Rambo indang poster ka lemsatepa liasü. Iba film ya David Morrell indang otsü kaket 'First Blood' nung ajemdaker yangluba film ka lir.

"Ni tawa India nung Rambo film yanglushir ta angazükogo. Iba character ya kanga tajung lir aser parnoki iba ya meraksatsütsü imlar," ta noksa den külemi Stallone-i caption



ka zülutsü.

Rambo film mezüngbuba "First Blood", ya 1982 küm yanglu aser iba film ajanga alima ajanga nungi senteper

sen million \$ 125 aazük. Iba sülen 2008 tashi nung iba film maneni yanglushia aruogo, koba ajanga alima ajanga nung sen million \$113 aazük.

India nung iba film yanglushiba nung Tiger Shroff-i tongti shilem agitsü aser Siddharth Anand-i direct asütsü. Maneni iba film ya M! Capital Ventures, Original Entertainment, Impact Films aser Siddharth Anand Pictures tem sentepa produce asütsü, ta osang ka ajanga metetdaksü.

Iba film otsü nung Indian Armed Force züngsemtem rongnungi tatembaq India-i meyipa aruba sülen par linük nunga rara aliba ngutetba aser koda pa kichai menokdangteti maparen balala inyak, iba dak sendakba otsü ka lir.

IIFA 2017 nung Ae Dil Hai Mushkil, MS Dhoni: The Untold Story na nomination timba lir



Mumbai, May 20 (Agencies): 18buba International Indian Film Academy (IIFA) Awards nung Karan Johar indang film "Ae Dil Hai Mushkil" timtiba nominate süa lir. Iba film shilem 8 tashi nung sempet angutsü asoshi maongka lir aser iba sülen "M.S. Dhoni: The Untold Story" nomination 7 nguteta tanabuba jenjang nung lir.

Iba film anaprongla Best Picture trophy atema Neerja, Pink, Sultan aser Uda Punjab film tem den tokteptsü.

IIFA nung nüngtugu category tem indang nomination tem Hokolbarnü osang ka ajanga sangdonga liasü. Alima ajanga nungi vote asütsüba Honibarnü

nungi tenzütsü aser June ita 18 tashi nūburtemi vote sūtettsü.

Anogo ana IIFA benjungmong July 14-15 New York, MetLife Stadium nung amongtsü asoshi renema lir. Iba benjungmong ya Wizcraft International Entertainment-i produce asütsü aser iba benjung nung film celebrity tem aikati shilem agitsü.

Teburtem Best Actor in Leading Role Nominees tem rongnung Uda Punjab film atema Shahid Kapoor, Ae Dil Hai Mushkil film atema Ranbir Kapoor, Fan film atema Shah Rukh Khan, M.S. Dhoni film atema Sushant Singh Rajput, Pink film atema Amitabh Bachchan aser Sultan film

atema Salman Khan. Kasa shilem nung tetsürtem rongnungi; Ae Dil Hai Mushkil film atema Anushka Sharma, Dear Zindagi aser Uda Punjab film tem atema Alia Bhatt, Neerja film atema Sonam Kapoor aser Pink film atema Taapsee Pannu alitsü.

Best Director nomination nung Johar (Ae Dil Hai Mushkil), Neeraj Pandey (M.S. Dhoni...), Ram Madhvani (Neerja), Aniruddha Roy Chowdhary (Pink), Ali Abbas Zafar (Sultan) aser Abhishek Chaubey (Uda Punjab) ta alitsü.

2017 IIFA benjungmong nung nungtugu actortem aser kentenertemi shilemagiba angutsü.

Half Girlfriend film sayaba anogonung sen crore 10 dak tali aazük

Mumbai, May 20 (Agencies): Arjun Kapoor aser Shraddha Kapoor nati tongti shilem agiba film Half Girlfriend sayar mezüng anogo box office nung sen crore 10.27 aazükogo.

"Half Girlfriend film ajanga mezüng anogo nung aazükba agi onok kanga temolung asür. 'Baahubali' film linük ajanga nung kanga nüngtugu süa repringtepba mapa ka nung aser IPI asaya teyalong nung süaka iba film sayar mezüng anogo nung sen crore 10.27 aazükogo," ta NH Studioz nungi Shreyans Hirawat-i ashi. Iba

company ajanga linük ajanga iba film lemshir.

'Half Girlfriend' film ya linük ajanga nung Hokolbarnü film sayudak 2500 nung sayaa liasü. Iba film ya Chetan Bhagat indang otsü katet nung ajemdaker yangluba film ka lir.

kasa mapang nung Irrfan Khan indang film 'Hindi Medium' ya sayaa liasü aser iba film ajanga tetenzükba anogo nung sen crore 2.81 aazük.

'Hindi Medium' film ya sen crore 22 indoka yanglu aser tang tashi nung digital, satellite, music aser overseas rights ajanga crore 15-bo ajangzükogo.



Actress Lisa Haydon aser la kinungbo Dino Lalvani na nem teburchanu ka moatsüogo. Tanobusang tenüng Zack Lalvani jatsü. Zack May 17 nū aso aser denati Instagram ajanga Honibarnü noksa ka lemsatepba yangi angur. Lisa Haydon aser Dino Lalvani na tang London nung telidak lir.

WannaCry Attack ya Cyber Security Firm tem atema shishilembaba tsütsü tajangzük lir

San Francisco, May 20 (Agencies): UK nung amenloker aliba cyber security firm Sophos Group Plc nung chief executive, Kris Hagerman atema taoba hopta mapang tamajung ka süla. WannaCry "ransomware" ajanga parnoki achayangba Britain National Health Service kar kongshia liasü koba ajanga surgery athiba dang masü ambulance tema meyipa yoka liasü. Iba sülen company-i parnok indang website nung "NHS ya Sophos ajanga kümzükba lir" ta inokja aliba olen indokadok. Industry aika nung iba amala tetsükdangtsü ajanga company tenüng menentsüla.

Aji saka Hombarnü, malware attack putetba sülen anogo 3 lir külen Sophos indang stock shilem 7 agi timba aküm aser ano company-i parnok indang 'financial forecasts' ajungketba sülen Bodhbarnü tali aküm.

Mongintemi iba amala timtem ajanga 'cyber security' industry tem tamakok anguba sayur ta shiaka 'cyber security firms' tem aika atema iba amala 'cyber attack' ya shishilembaba tsütsü tajangzük lir.

"Nisungtemi onok dang kodaser nenoki 'cyber crime' tebilemstitem maziükteter" ta

asüngdang aser ibaji nisung küm meyirejang aika lia arudar saka kodaser özüng alema inyakba maparentem maziükteter ta asüngdangba den kasa lir," ta Hagerman-i iba hopta interview ka nung ashi.

Hagerman-i ashiba agi, par company ajanga NHS nung shilem 60 dang tekümzükba agütsür aser tanungba shilem tem nung timtem aliba ajanga iba timtem atalok.

Medical device mapang talangka amshia aruba tem nung kümzükba maliba osang meyirejang aika lir, ta Josh cyber security industry veteran Corman-i ashi aser U.S. medical institution shilem 85 shi nungbo basic cybersecurity tasks; software yanglushitsüba, lendong asadangtsüba aser network tem ka nungi ka piladaksütsü asoshi tangazükba shidak aliba tamshirtem mali, ta paisa shisem.

Digital technology ainba den külemi cyber security dak sendakba nung tebilemstitem aika adoktsü, anungji mozüki tem nung nurse ka ana talila aniokba dang nungibo 'cyber security' dak sendakba nung tangazükba tajung ngur alirtem mapa nung anioktsü nüngdaker.



Vijayawada, May 20, 2017: Urban Development, Housing & Urban Poverty Alleviation and Information & Broadcasting Union Minister, M. Venkaiah Naidu, Governing Council of United Nations-Habitat nung Tir shimba atema pa nem tetushi agutsüba sentong nung Honibarnü Vijayawada nung pai (Naidu) jembiba noksa nung angur.

'Triple Talaq' sobaliba menokdangra sorkari tiyongi ia inyaksü: Naidu

Amravati, May 20 (Agencies): Muslim nungertemi 'triple talaq' nokdangtsü atema ozüng ka meyanglura sorkari tiyongtsüi aita inyaksüsa akumtsü, ta tanü Union minister, M Venkaiah Naidu-i metetdaksü. Tanü Maharashtra state kübok Amravati nung senden ka nung jembidang Naidu-i, "Loktii iba onük agizüka inyaksüla, iba den külemi parnoki (Muslim) iba sobaliba anenra tajung asütsü. Ajimesüra sorkari iba (tribe talaq) ya anentsüsü atema ozüng ka yanglutsüsa akumtsü," ta metetdaksü. "Iba ya nija onüktem nung tiyongtsüi ia inyakba ka masü, saka tetsürtem nem ochi temeten agütsüba onük ka lir. Tetsür ajak nem kasa temeten agütsüsüla. Iba ya, ozüng tsüngdang ajak kasa züngshitsüla, ta asüba onük ka

lir," ta Union Information and Broadcasting Minister, Naidu-isa metetdaksü. Pai ashiba agi, Hindu lokti nunga temenen mapatem nokdangtsü atema ozüngtem yangluogo, aser item rongnung tanur asüdangyongi kibong kümdaktsüba, kinüngbu süra kinüngtsü rongseta asüba aser kiyimlai kinüngbu nem kibong akümdang sen agütsüba densema lir. "Hindu loktii tanur asüdang kibong kümdaktsüba onük nung o lemtep aser ibaji nokdangtsü atema Parliament nung ozüng ka benoka aji agizük. Tanabuba nung 'sati' lir, kong tebur ka süra pa kinüngtsüa asür. Tangbo Hindu nungeri itemji ozüng yanglua nokdang. Tasembubaji dowry lir, aser ibaji nokdangtsü atema Dowry Prohibition Act agizük aser Hindu nungeria ibaji agizük," ta Union

Minister-isa ashi. "Item ama sobaliba inyakyimji lokti anema lir ta rateta Hindu loktii item onük nung o lemtep aser ozüng tasen yanglu. Ano inyakyim kar nung temelenshi nungdaka lir, aser iba atemaji meranga inyakdar," ta paisa ashi. "Meimchie kaji meimchir ama züngshitsüla, aser iba nungji Hindu nunger, Khristianpur mesüra Muslim ta melemdangtsüla. Item ama sobaliba inyakyim ajanga tetsürtem temeten anema meinyaktsüla," ta paisa ashi. Naidu-i yimtenren nung küm aika tenzüka arudar, aser pai ashiba agi, pai Narendra Modi küm 10 tashi Ato kilonser inyakdaksüner. "Linük nüburtemi Modi aginer. Pa küm ter tashi Ato kilonser inyakra, alima nung ano India tashi taitba akumtsü," ta pai ashi.

BJP sorkari nüburtem nem tesünep magütsüteter: Mayawati

Lucknow, May 20 (Agencies): Tanü BSP tongti lenir, Mayawati-i, Uttar Pradesh nung BJP sorkari nüburtem nem tesünep aser security magütsüteter, ta aitsü. UP Chief Minister, Yogi Adityanath-i, par sorkari ozüng alema inyakerteri angatetsüsa parnok oshi agi jembitsü, ta jembiba aija Mayawati-i, sorkari mapa agi masü saka o agi dang inyaker,

ta aitsü. "Iba sorkari temzüng nung aliba tongtibang teinyaktsü-nüburtem nem tesünep aser security agütsütsü nung tamakok nguogo," ta lai ashi. State nung sorkar melenba ajanga nüburtemi tajangzük kecha mangur, kechiyong ozüng alema inyakba mapatem ajema makümer, ta laisa ashi. "BJP nem vote agütsür shishilembartem anema

maneni inyakba ajanga parnoki longkak aiter. Saharanpur aser Mathura nung tatalokbatem ajanga Yogi Adityanath-i aniba sorkari yazü jembiba jungkai adoktsüogo," ta lai ashi. BSP lenirisa, BJP-i Uttar Pradesh nung temelenshi bener arütsütsü nangzük, ajisüaka police tema tazük achir, anungji iba ya tebilemtsü tulu ka lir, ta ashi.



Jodhpur, May 20, 2017: 'World Anti Terrorism Day' atongtsü anogo ka dang lia Honibarnü Maulana Azad Muslim Mahila Teachers Training College, Jodhpur nung kaketshirtemi kiralongra anema ozülü balala amer yimiyim ayima yimdong süa jajaba noksa nung angur.

Amit Shah-i Centre sorkari küm 3 nung inyaktetbatem metetdaksü

New Delhi, May 20 (Agencies): Honibarnü Bharatiya Janata Party (BJP) Tir, Amit Shah-i Narendra Modi-i aniba sorkari tesüba küm asem tsüngda inyaktetba tongtibang mapatem indang metetdaksü. Tanü New Delhi nung BJP office ka semzüksüba sülen osangbenertem senden nung jembidang pai sorkari inyaktetba tongti mapatem osang metetdaksü.

olen ka nung BJP tongti lenirisa, "Modi'er sorkari linük nung kibong ka yimtenren anentsüogo," ta ashi. Ochimashi sen anema demonetisation mera agiba atema Shah-i Ato kilonser, Narendra Modi nem tenüngsang agüja jembiba. "Yimtenren tabensaba akumtsü aser tashitait akumtsü, iba den külemi nübur tenzüka nung ochimashi malitsü atema Modi'er sorkari mera tajung aika agiogo," ta Shah-i ashi.

2019 küm Lok Sabha election nung BJP-i melamela takok angutsü nükjidong nung tang BJP Tir, Amit Shah-i anogo 95 tashi linük tesem ajaklen sema senzü tenzüko. Shah-i Other Backward Class (OBC) telok dang, "Modi'er sorkari OBC Commission nem Constitutional jenjang agütsüba teinyaktetba tulu ka lir," ta ashi. Congress party aitsüba

Swachh Bharat Mission dak sendakba nung pai, "Ato kilonseri iba atema mera agia inyakba ajanga linük nung metsümeshidak crore pezü yangluogo," ta ashi. BJP züngsem kanga zünba dak sendakba nung pai, "BJP ya züngsem 10 agi dang tenzü, saka tangbo party züngsem crore 11 dak tema lir aser ibaji alima nung yimtenren party tulutiba lir," ta ashi.

June 3 nungi EVM hackathon tenzüksü: Election Commission



May 20, 2017 nü New Delhi nung 'EVM Challenge' onük nung osangbenertem senden metenzükdang Chief Election Commissioner, Nasim Zaidi dang EVMs aser VVPATs amshia sayuba noksa nung angur.

New Delhi, May 20 (Agencies): June 3, 2017 nü nungi tenzüka EVMs raksaa sayutsü atema yimtenren party tem ayongzük, ta tanü Election Commission-i sangdongogo. Hopta ishika tejaklen yimtenren party temi, tawa assembly election nung amshiba Electronic Voting Machines (EVM) ji raksaa amshitsü akoker, ta aitsüba sülen tanü EC-i iba osang ya sangdonger. "EVM raksaa amshia sayutsü atema June 3 nungi onoki ayongzük," ta Chief Election Commissioner, Nasim Zaidi-i tanü osangbenertem senden ka nung metetdaksü.

technological features tajung lir aser raksaa amshitsü makok," ta paisa ashi. Paisa, election inyakyim nung temelenshi atema inyaktsüji stakeholders ajak teinyaktsü khuret lir, aser iba atema EC-i akokba tashi inyakdar, ta ashi. Opposition party aikati, joko EVMs nung nüburtem tamang samaogo, ta jembir. BSP aser AAP-ibo, tawa Uttar Pradesh, Uttarakhand, Manipur, Goa aser Punjab assembly election tem nung amshiba EVMs ji raksaa amshio, aser ibaji ajanga BJP ajangzükogo, ta aitsü. Iba sülen ano tanga party aikatia EC dang election nung EVMs masü saka paper ballots dang amshitsü takhangba agütsüogo. Tamalen EC-i, taruba nungibo Lok Sabha aser assembly election ajak nung paper trail aketba EVMs amshitsü, ta nangzükogo.

Paisa, EVMs dak tamang makateterteri tanü tashi nung EVM raksaa amshiba kuli magütsüteter, ta metetdaksü. Zaidi-i ashiba agi, EVMs nung aliba internal circuit ji melentsü khenyongi makoktsü. "Onok indang EVMs nung

US Tir Trump-i mezüngbuba 'Foreign Tour' senzür SAUDI ARABIA DEN \$110 BILLION SHI ALANG TENANGZÜKTEP AGI



Riyadh, Saudi Arabia nung Saudi Arabia Chuba Salman bin Abdulaziz Al Saud-i U.S. Tir Donald Trump aser pa kinungtsü Melania Trump na den ajurutepdang agiba noksa angur.

Riyadh, May 20 (Agencies): Honibar anepdang US Tir Donald Trump-i Saudi Arabia semdangtsü atema Riyadh atong aser iba mapang White House-i Saudi den \$110 billion shi alang military tenangzüktep agitsü ta osang metetdaksü.

Trump-i US Tir mapa inyakba sülen tang mezüng atema bendanglima sema senzür aser anogo tinü linük balala sema senzütsü tenzükdang, Saudi Arabia den USD 110 billion alang US defence equipment & services tenangzüktep agitsü ta osang metetdaksü.

Tanep Riyadh nung aliba King Khalid International

Airport nung Air Force One anenzükdang Saudi King Salman-i Trump aser kinungtsü Melania Trump na pela agizük.

Tayimtsü anendak nungi Trump aser pa meinertem ajak royal court-i anir ao aser idakji US Tir nem Collar of Abdulaziz Al Saud tetushi agütsü. Iba ya Saudi Arabia nung civilian sempet tematiba lir.

Arm tsütsü tenangzüktep agiba dak alia US company General Electric-ia sen \$15 billion alang tenangzüktep aser memorandums of understanding agitepogo ta metetdaksü.

"Iran-i amokmerenba mapang ka nung Saudi Arabia

asur Gulf region nung security akangshitsü atema defence equipment & services maparenji inyaker" ta tanü White House ketdangser kati ashi.

Tanü Trump-i Salman den senden amen aser pai asüng Muslim linüktem nungi lennirtem den o jembitsü.

Trump jakdang inyaker Barack Obama-i Shiite nung teimba aliba Iran ang sapur ta Sunni Arab Gulf state temi temulung melemi bilemba agi, parnok US den tesentaktep mejungi aküm saka tang Trump-i Saudi Arabia semdangba ajanga tesentaktep akangshitsü ta imlar.

Iran nung Hassan Rouhani-i tanaben Tir inyaktsü

Tehran, May 20 (Agencies): Iran President Hassan Rouhani-i Honibarnü re-election nung takok tulu nguogo. Rouhani-i alima den tesentaktep yanglutsü merangba aser rongsenkettsüing jenjang ajungkettsü merangba atema nübertemi pa nem vote agütsüogo.

Arishi küm 68 tain Rouhani-i tashitait linüktem den 2015 nuclear tenangzüktep agiba maparen ketdangtsüa inyak. Re-election nung pai 23.5 million votes angu aser ibaji noklang nung shilem 57 shi lir. Pa den tokteper Ebrahim Raisi-i vote million 15.8 (38.3%) angu.

Iran-i alima den tesentaktep yanglutsü merangba nung tetsükdaksü ka ajuruogo aser ibaji US President Donald Trump-i nuclear tenangzüktep agientsü ta amokmerenba lir. Tang Trump-i Iran den toktepa linük Saudi Arabia semdang.

Yashi re-election agidang ketdangsertemi vote agütsüba mapang ghonda aika atsülangtsüsa aküm, kechiyong tesüiba küm 20 tsüingda voters list nung nisung million 20 shi bendenloka liasü.

"Yasüing nungi onoki takok tulu angutsü ta bilema liasü aser ibaji asangdang nung atalokogo"

ta Iranian Privatisation Organisation adviser Farid Dehdilani-i ashi. Pa ya Rouhani'er election nüboyimba nung shilem agia liasü.

"Ozü nübertemi President Rouhani dak temulung alemba nangzüksshio go aser alima den tesentaktep yanglutsü merangba pusema nungiter ta parnoki sayuogo" ta Farid-isa shisem.

Syrian rara nung Iran den yariteper Russia President Vladimir Putin aser EU foreign policy tanishir Federica Mogherini nati Rouhani nem tenüngsang agütsü.



Dead Sea nung aliba King Hussein Convention Centre nung (achiji nungi) World Economic Forum (WEF) Executive Chairman aser founder Klaus Schwab kinungtsüHilde Schwab, Spain Chuba Felipe, Jordan Cubatsür Rania, Jordan Chuba Abdullah, Iraq Tir Fuad Masum aser Palestine Tir Mahmoud Abbas nungertem 'World Economic Forum on the Middle East and North Africa' nung adendang agiba noksa angur. (Dead Sea, May 20)

Bangladesh Police-i Khaleda Zia'er office mit


Dhaka, May 20 (Agencies): Honibarnü Bangladesh police-i opposition lennir aser taoba Prime Minister Khaleda Zia indang office mita repring.

Police-i Zia indang office nung linük anemba kulikakettem bushitep aser iba ajanga la pusemertemi lungkak aita liasü.

Dhaka kübok Gulshan kiyong nung tanep police tem arua BNP tanishir Zias indang office mita repring saka parnoki kecha mangu ta osang metetdaksüogo.

Parnok ket nung 'search warrant' liasü ta police-i ashir saka Bangladesh Nationalist Party-i ashiba agi police-i mejangjaba general diary ka amer Zia amokmerentsü merang.

Tanü Zia'er BNP züngsem noklang aikati lar office kima adenshir lungkak ait. Iba ya Awami League-i BNP anema inyakba mapa ka lir aser Zia



Khaleda Zia

timtemdaksütsü atema dang liasü, ta BNP-i ashi.

"Iba office nung linük security dak kongshitsüsa taittsü aketba kuli bushitsü atema onok ket nung okadak nungi temelaba lir" ta Gulshan Police Station OC, Abu Bakar Siddique-i osangbener dang ashi.

Police-i Zia'er office mitba atema asüing linük ajungalen lungkak aitba sentong agitsü ta BNP aser parnok den yaritepertemi metetdaksüogo.

Syria nung Islamic State-i civilian 19 tepset



May 20, 2017 nü Syria kübok Homs yimti nung aliba al-Waer kiyong nungi tetsür aser tanurtem anir aoba noksa nung angur. Telungpurtem aser Syria army tsüingda tenangzüktep ka agiba sülen taküm March ita nungi al-Waer nung aliba telungpurtem aser parnok kibongtemi iba tesem toktsür tangaleni aoer. Tang tashi nung telungpur aser civilian 18,000 shi kati iba kiyong toktsür ogo.

Beirut, May 20 (Agencies): Democratic Forces alliance Islamic State züngsemtemi (SDF) züngsem asem pur anir Syria kübok yimtsüing ka nung tanur ana dena civilian 19 tepsetogo, ta Honibarnü Syrian Observatory for Human Rights-i metetdaksü.

"Hokolbar nikongtsütsü IS kiralongrartem Jazrat al-Boushams yimtsüing ao aser civilian 19 tepset. Tasürtem rongnung tetsür ana aser tanur ana dena liasü. Parnoki tekolak nung injang agi khaset aser iba sülen mangtemji mi agi rongdok" ta SOHR tekolak Rami Abdel Rahman-i ashi.

"Nisung kar yimdong nung putener tepset aser kar kidang lia tepset" ta Rahman-isa ashi. IS kiralongrartemi Syrian

Democratic Forces alliance (SDF) züngsem asem pur anir ao, ta paisa shisem.

SDF ya Kurdish-Arab telok ka lir aser IS den rara nung US-i parnok nem teyari agüja nungiter.

Jazrat al-Boushams yimtsüing ya Deir Ezzor province nung lir aser iba tesem ya jihadist temi amokbanga lir.

Brihostibarnüa Syria kübok Hama province nung sorkari agia aliba yimtsüing ana nung IS-i nisung 50 dak tema tepset.

Iba tatalokba sülen, US Defence Secretary Jim Mattis-i "President Donald Trump-i Pentagon dang Syria nung IS pur samatsütsü tetuyuba agütsüogo" ta metetdaksü.

KYO-i sorkar & Construction Company... (TAPAK 1 NUNGI...)



Peducha anentsüh alua alidak kanga mazüngi lenmang sadema lapoktsü atema inyakba noksa nung angur. (Kohima, May 20)

Sorkari tekaratiba nung gari lenmang meyanglura, gari lenmang nung gari aika mesenzütetsü aser iba atema KYO-i lenmang yanglutsü atema shibangtsüsa akümtsü, ta KYO-isa ashi. Maneni, KYO ketdangpur-

temisa Kiruphema lushi nung (Bamboo Hotel anasa Noumvürü ayong nungi Essar petrol pump anasa Dierü tashi) KYO dang asüngdangya mesüi ali meindoktsü tetuyuba agütsüogo. KYO-isa four laning construction company dang Kiruphema lushi nung takoksa ajurubatem asadangtsü aser takoksa ajururtem nem tekaratiba nung temenok agütsütsü metetdaksüogo.

Kiruphema lushi nung anentsüh ajanga timtem ajururtemi 8730953383, 8974343540, 9862667194 & 8730877857 number tem nung tongteprateptsü metetdaksür, ta KYO-isa ashi.

ULB aser Art 371(A) indang... (TAPAK 1 NUNGI...)

Arrla 371(A)ji Linük Temzüng (13th Amendment) ajanga Linük Temzüng nung enokba lir aser temeten balaka agüja alibatemji Parliament ajanga yangluba lir aser iba ya State sorkari pei tashi kübok yangluba ozüng nung mamshitetsü. Nagaland Municipal Act (NMA) ji state ozüng ka lir aser iba Act nung Arrla 371(A) mamshitetsü, ta Justice Zelre-isa shisem.

Iba sentong nung tongti tesemdangerji Chief Minister Dr. Shürhozelie Liezietsü liasü aser pai o jembidang, "taküm February

ita state sorkari ULB elections lemtetbaji, Linük Temzüng nung Arrla 371(A) kümzüka ayutsü atema liasü, kechiyong iba ya state aser nübortem atema kanga tongtipang lir" ta ashi.

ULB nung tetsür nem shilem lemzüksüba ajanga Naga nung sobaliba inyakyim nung kongshitsü ta nisung aikati bilema election anema nokdak. Ajisüaka, sorkari bilembabo, Linük Temzüng nung lateta aliba ama tetsür nem shilem lemzüksüba ULB election magira, Supreme Court-i Arrla 371(A) alema oshidang

agütsütsü akok aser ibaji ajanga Naga nung atema tetsükdaksü bener arutsütsü, ta Dr. Shürhozelie -i ashi.

Iba tebilemtsü atema olemtep aser shisa lemsatep tajung akatsüla aser aji asü nung dang asenoki tarutsü nung aibelen masütsü, ta Chief Minister-isa shisem.

Iba sentong nung mendenji Ex-PAN general secretary Medokul Sophie liasü, State Chaplain Rev. Kuzierang Thou-i temoatsü meshia sarasadem, Ex-PAN President T. Khongo-i tesentepertem pela agizük aser Dr. Chumben Murry-i anküp tepela o jembidi.

India-China tesendaktep ajanga... (TAPAK 1 NUNGI...)

Iba senden nung Jammu & Kashmir, Himachal Pradesh, Uttarakhand, Sikkim aser Arunachal Pradesh chief minister tem den Rajnath-i arrtsü dak sendakba onüktem asadanga liasü.

Senden nungsa Home Ministry-i inyakba terenlok

mapatem, Border Area Development Programme aser state tem o Indo-Tibetan Border Police tsngda amalitepa inyakba onüktem nunga o lemtepa liasü.

Asüng Rajnath-i Sashstra Seema Bal (SSB) Battalion Headquarters-a semdangtsü aser

tayimtsü nung mener Uttarey, Kumukh aser Bajrajadhara nung aliba SSB border post tem repranga senzütsü.

Home Minister-isa Sainik Sammelan nung sepaitem ajurutsü aser Sikkim, Pelling nung sentong ka nung jembitsü.

Politics nungbo teti medemera mali ... (TAPAK 1 NUNGI...)



Adviser to CM aser Mokokchung Division Incharge Nuklutoshii jembidang, pa den NPF Mokokchung division tir Moasangba Jamir (achiji) aser Tongti zülur (Admin) Tangit Imsong na noksa nung angur. Mokokchung, 20th May, 2017

Yimya agi, "politics nungbo teti medemera mali aser teti tsükchira mali, khenkhen atutsü aser khenkhen alutsü aser aji yimya dang", ta party pur dang temulung ajema malitsü asoshi olen ka ashi. Aji oda, "shirnok party nungi atsüngzüka lir, item purji anioka taruba 2018 election-ji kodusür takok tajung angutsü ta asüba nükla yur inyakdaksünür", ta paisa ayongzüka liasü.

"Party atema ni kangki nung metaogo aser ni party atema bendanga agütsüba ajanga tanü

ni iba jenjang nung lir", ta osangbener senden ka nung Nüklutoshii jembidang ashi.

Iba osangbeneri, "tawa regional party tasen ka tentetba jagi NPF nung tapok apatsü asü?" ta metetnüa asüngdangdang, "iba jagi NPF nung timtem kecha malitsü", ta langzü.

"Taruba election nung shir teloki sorkar yanglutsü amai bilemer?" ta metetnüa asüngdangdang, "Party-i ticket-ji koba yimya nung alemer aser lenir (CM asütsü) shiba shimer ta asüba dak tulu keta lir,

kechiyong ibaji kanga tongtibang lir" ta ashi. "Tang tashibo tanga party dang nungi NPF sa jenjang tajungba lir, anungji, taruba election nunga NPF-isa sorkarji akümtsü asoshi meranga inyaktsü", ta ashi.

"NPF telungtet nung telemsa lir mali?" ta asüngdangba ka langzüdang, "onok tsüngda melungjemba ajanga iba tenure tepiyong timtem aika ajurua aruogo, tang yaa tema nungbo lungjemmer amai sayur saka kangabo mesüngjemtetir lir", ta paisa ashi.

MULUNGNEN O



Aso : 22.09.1959

Asü : 17.05.2017

Lt. Temjenniken Walling (Mekuli)

Pa mapa ajak nung temeim aser taochi lir, teindang, tenendak aser ochi. Teti menungratsüsa pai mapa tajung dang yutsür ogo. Onoki teti meima aliba Asür Temjenniken Walling shirangba mapang nungi tasünü tashi shirnokisa nübu, rongsen den sarasadem agi yaritepogo, nenok ajak dang mulung nena pelaba lemsateper. Tsüngremi nenok mapa tajung asoshi talubusa moatsütsü onok tamang sarasadem.

- Temeim kinüngtsü, chirnur & kinüngertem

PELABA SANGDONGER

Nübur ajangzüksü asoshi onok Meyilenden Dam Welfare Society ajanga Mongsenyimti lushi Nanüng ayong nung Ango tzübu (Fishery Pond) tulu ka acha-ayanga lir. Iba tzübu nung ango puoktsü kanga nungdaka aliba mapang nung Fishery department nung ketdangsur Shri. Imtisunep (District Fishery Officer) ajanga ango metsü packet 50 agüja puokogo ta pelaba nübur den lemsateper. Ano tarutsü nunga pa lenisüba mapang Department nungi teyari angutsü imlaa atar.

Sd/-
Senti Pongen
President
Meyilenden Dam
Fishery Welfare Society
Mongsenyimti

Sd/-
S. Ramok Ozukum
Secretary
Meyilenden Dam
Fishery Welfare Society
Mongsenyimti

METONGSHITSÜR

Tir Yimyim (Adok 204) May 14th 2017, nung Waromung Shisashir Telongjem (WST) ajanga tenüngsang agütsüba nung Mr. Chubatemsu Ozukum S/o Lt. Sashimar Ozukum ta alibaji Lt. Sashimeren Ozukum ta metongshitsür.

Tsuongsang Jamir
President, WST

JANGJASHITSUR

Koba Tir Yim Yim adok Dated 6/5/17 nung NPF Party dissolve asü ta adokbaji tai. Saka onok Party Office Bearers aser Committee melentepsü asoshi anena ataba dang ta metetdaksür. Anungji onoki 30 Alongtaki AC nungi adokba Parliamentary Secretary Dr. Benjongliiba Aier tashi aser shisatsü ajak agi nungita yaritsü ta sangdonger.

1. S. Tamangba
 2. Maongtemgen
 3. N. Rongdenkaba
 4. Supongmar
 5. Lontipokim
 6. Temsumetken
 7. Moatengon
- 59/-
C. Wati - Mallier
Lincem
30th A/c youth wing
President

OFFICE OF THE LANGPANGKONG KAKETSHIR MUNG DANG (LKM)

H.Q. CHUCHUYIMLANG-798614, DIST. MOKOKCHUNG: NAGALAND.

Langpangkong Kaketshir Mung dang (LKM) ajanga taküm 2017 küm NBSE agiba HSLC aser HSSLC tatitang nung Langpangkong nung kaketshirtem kwikati takok nguogo nenok ajak nem tenüngsang agütsür. Talisa ano item teküpboklen agüja aliba kaketshirtemi ajak dang nungi alia takok aser konang nüngsang tulu kaketshir mung dang nem bener arutsü nung tenüngsang tulu agütsür:

1. Sp. Moamanen Jamir (Changtongya) Wb. I. Shilu Jamir'er jabaso-i HSLC tatitang nung Fernwood School, Kohima nungi 10th buba jenjang nung takok angu aser ano Information Technology (IT) nunga tematiba marks ngutet.
2. Kr. Temjeninla Jamir (Mongsenyimti) Wb. I. Meyionen Jamir'er jala Northfield School, Kohima nungi HSLC tatitang nung 16th buba jenjang nung takok angu aser ano laia mathematics nunga 100% marks nguteta liasü.
3. Sp. Lanukaba (Yaongyimsen) Wb. Sakumongba Lemtur'er jabaso-i Christian Hr. Secondary School nungi HSSLC (Arts stream) tatitang nung 5th buba jenjang nung takok angu Kaketshir Mung dangi takok angur kaketshirtem ajak tarutsü anogotem nunga maneni parnok azüngba wadang balala nung takok tajung ngujang ta sarasadema moatsür.

Kaket Rejusanger wadang nung,

Sd/-
Imnakika Jamir
Tir, LKM.

Sd/-
Imtisungkum Lemtur
Tongti Zulur, LKM.

1buba Futsal tournament Adroit Boys-i kokogo



Kohima Local Ground nung May 20 nü takoker Adroit Boys, Ruopfü Meyase aser asayamong ayongertem tangokba noksa nung angur.

Kohima, May 20 (TYO): Asaya nung goal Adroit Boys nungi Zeanikho Miasalhou-i agütsü. Runners-up Soccer Heroes FC puri senpet sen 15,000 agizük. Semi final tonga asayar Legend Lads aser A Yhome FC na prongla nem senpet sem 5000 agütsü. Adroit Boys nungi Shürhosül Zhotso, Soccer Heroes nungi Neikethozo Yhom, Adroit Boys

Asaya nung goal Adroit Boys nungi Zeanikho Miasalhou-i agütsü. Runners-up Soccer Heroes FC puri senpet sen 15,000 agizük. Semi final tonga asayar Legend Lads aser A Yhome FC na prongla nem senpet sem 5000 agütsü.

Adroit Boys nungi Shürhosül Zhotso, Soccer Heroes nungi Neikethozo Yhom, Adroit Boys

nungi Rajusito Nagi aser Legend Lads FC nungi Keyidwasapiung Kulimbe nungeri man of the match, player of the tournament, best goal keeper aser highest goal scorer jenzang nguteta liasü. State Football Coach, Ruopfü Meyase-i takokernem award balala agütsü. Iba asayamong nung telok ajak agi 45-i shilem agi.

Iba asayamong nung telok ajak agi 45-i shilem agi.

Simona Halep Italian Open final-i iogo

May 20, 2017 (Agencies): Romania tsür Simona Halep-i Honibarnü Dutch tsür Kiki Bertens madak 7-5 6-1 agi koka Italian Open final-i iogo. Halep ya WTA ranking nung jenzang 6 buba nung lir aser taoba hopta Madrid open-a lai koka liasü. Lai iba asayamong anaben atonga kokogo. La French Open champion Spain tsür Garbine Muguruza mesüra Ukraine tsür Elina Svitolina den Deobranü final asayatsü. Iba takok ya Halep atema Clay nung asaya 12 buba takok alitsü. Lai semifinal asaya ghonda kaser minute 17 nung koka liasü. Aonung sangwaa tzünglu aruba ajanga asaya



ghonda tesimalang ka menur ang tenzüktet.

"Iba asaya akokba atema ni kanga pelar. Tzünglu aruba ajanga asaya metembangtetsü ta bilem saka asaya kanga junga asayatetogo aser final asayatsü asoshi kanga pelar," ta Halep-i ashi. "Ni kü sasadak kanga

temolung lema bilemer aser Madrid nung takok anguba ajanga court nung tashi ita asayateter. Ni kanga jangratema bilemer aser yamai dang asayaner aser iba title-a kokner," ta laisa ashi.

Bopanna, Sania tsükogo
Bopanna aser pa partner Pablo Cuevas na 4buba jenzang nung aliba Pierre-Hugues Herbert aser Nicolas Mahut na den quarterfinals asaya nung 6-7(5) 7-6(2) 10-12 agi mekoki asayamong nungi toguogo.

Kasa mapang nung WTA asaya nung Sania Mirza aser Yaroslava Shvedova nati 3-6 6-7(7) agi tanabuba jenzang nung aliba Yung-Jan Chan aser Martina Hingis na makok.



Qatar, May 20 : Qatar yimtiba Doha, Khalifa International Stadium nung Qatar Emir Cup Final asayaba sülen Al-Sadd telok nungi züngsemtem Al-Rayyan goal 2-1 agi koker pelatepba mapang tangokba noksa nung angur.

MAY 21, 2017 ASAYA
-----FINAL-----

VS

8:00 PM

9buba OBT nung telok 20-i shilem agitsü

Dimapur, May 20 (TYO) : Nagaland Basketball Association (NBA) aser Suncity Club Kohima nati ayongzükba 9buba Open Basketball Tournament(OBT) nung telok 20-i shilem agitsü.

Iba asayamong May 24 nungi 27 tashi Khouchiezie, Kohima Local Ground nung akatsü.

Asayamong nung shilem agitsüba teloktem yamai alitsü; Amplified , Kohima; Taurus, Kohima; Team Mystic Ballers (A), Kohima; Werewolves, Kohima; Dorians, Dimapur; Highland Dazzlers, Mokokchung; Tiyi Hoppers, Wokha; Buzzards, S.Naga Trouncers, Skyhooks, Kohima; Team Oroa, Kohima; Stingrays, Kohima; Waxbill, Kohima; St. Joseph College, Jakhama; Kohima Chiefs, Team Titans, Doberman, Team Mystic Ballers(B) aser Team Airhogs Kohima.

Amplified , Kohima; Taurus, Kohima; Team Mystic Ballers (A), Kohima aser Werewolves, Kohima nunger nem agütsüiogo aser parnok pool leader asütsü. Ibuba round nung team 16 asayatsü aser item rongnungi takoker telok 8 2buba round nung bye nung aliba telok 4 den

külemi asayatsü. Iba round ya league round asütsü aser takoker 4 semifinal asayatsü.

Iba asayamong nung features tasentemji: Indoors roofing, asayartem aser tereprangertem atema Food court, digital score board, hydraulic rings, LED board display , Live coevarge aser final anogo nung Live DJ alitsü.

Honibarnü 9buba BOT omen ken Youtube nung officially sayaogo.

Basketball asayatsü aser reprangtsü jangrartem aika arua iba asayamong nung shilem agitsü asoshi imlar. Asayatem anüngdang aser aongnung asayatsü aser nisungshia ticket sen 50 alitsü.

May 24 nü nikongtsütsü 3:00 ako nung asayamong lapokba sentong akatsü. Iba sentong nung Youth Resources & Sports parliamentary secretary Khekaho Assumi tongtitesemdanger asütsü.

Maneni sentong nung pelaa agizükba o Zhaleo Rio, Rtd IAS aser MLA aser President of Nagaland Basketball Association(NBA)-i jembitsü.

Asayamong tetenzük asaya St. Joseph College, Jakhama aser S.Naga Trouncers na asayatsü.

May 27 nü final masaya tsüngda sub-junior exhibition match ka asayatsü.

**Yimlibilema,
ne temesen anepaluang**

LIVSAV^{DS}

Syrup/Capsule

Mfg. by: Medintra Research Health Products Pvt. Ltd, Thane (Maharashtra).
CUSTOMER CARE:- 022-6540183

BILEMDANGANG
"Nai nuk"